

Tí nkehe chrónka Jesucristo k'uíkon ch'ín Juan

¹ 18

Kaín tí nkehe i mé chénka Dios Jesucristo kixin jehe ch'án tsochénka tí sín ch'ehe ch'án xra tí nkehe tjoka tsonhen. Ntá Jesucristo kjuínchenohe ijnko ángel kuènte ch'án kixin nkexrí chrókónohe tí ch'ín Juan ch'ehe ch'án xra.

² A ntá jehe ch'án mé k'uituenhen ch'án ntá chrónkaxín tí nkehe chaxín tsíntácho Dios la ko tí nkehe chrónka Jesucristo la ko kaín tí nkehe tsík'íkon ch'án nkexrí kjuakoxin Dios.

³ Náxrjón tjejó tí sín nchekuáxin tí xroon i la ko kjaxin tí sín tjejótinhin tí palabra chrónka nkehe tsonhen la ko tóxrjnhin sín titekaon sín nkehe nixja tí xroon i kixin ó kuichjina tí hora tsoxiteyá tíha.

Ch'ín Juan ikjin ch'án xroon ts'áyéhe tí yato nínko

⁴ Janhan Juan ikjian tí xroon tsochr'anhan tí yato nínko tjejó estado Asia. Jahará chrók'uayéherá kjuasáyé Dios la ko kjuaxróxin. Jehe ch'án mé itjen ch'án la ko xráxín tjen ch'án la ko jehe ch'án mé xiki ch'án inaá la ko kjaxin tí yato Nchakuen ch'án tjejó tí trono t'etōanxín ch'án mé tjanjon kjuaxróxin.

⁵ La ko kjaxin kjuasáyé Jesucristo. Jehe ch'án chaxín chrónka kaín nkehe ntoá la ko jehe ch'án mé xrankíxixín xechón kjónté tsík'en kixin tjetoan ch'án kixin t'etuenhen ch'án kjónté kaín tí sín rey

la ko tí sín t'et̄oan síin chjasintajni. Jehe ch'án mé tjuèheni ch'án la ko tí ijñié ch'án mé k'uújmáxinni kaín tí jie chóntani.

⁶ Jehe ch'án mé tsíkjanjon kjuachaxin tsík'ónani nchat'á kixin sich'ehe ni xra It'éni Dios. Tí kjuachaxin kuènte ch'án me ts'et̄oan jnkochrín. Mé xikaha tsoxiteyá. Amén.

⁷ Ts'ikon chojni kixin Cristo la ó tsi chríkjan tjuí. Kaín chojni ts'ikon ch'án la ko kjaxin tí sín k'uékónínkakohen tí jehe ch'án tsíkjinchekjasóte sín ch'án mé ts'ikon sín ch'án la ko kaín chojni chjasin síin chjasintajni tsotsjánka sín tió ts'ikon sín tí jehe ch'án. Mé xikaha tsonhen. Amén.

⁸ Janhan mé tí xrankíxixín la ko tí tsjixixín éxí tí letra xrankíxixín A la tsjixixín Zeta. Mé xikaha ichro Ìnchéni Dios, tí nkexro imá t'et̄oan. Jehe ch'án mé itjen ch'án la ko xráxín tjen ch'án la ko jehe ch'án mé xiki ch'án inaá.

Ch'ín Juan tsík'ikon ch'án kixin Cristo chóna kjuachaxin

⁹ Janhan Juan mé ijnko kichó tí jahará mé tjékian Jesús la ko tí kjuachaxin kuènte Dios chonta la mé jahará la ko jeheni jnkokón tjejótjasóteni la jehe ch'án tjinkitsani kixin tsjachani. Kjuàkua itén Dios éxí chrónka Jesucristo la mé tíha kjuak'échjínaxián tí isla it'in Patmos.

¹⁰ A ntá ijnko yaon xraxinkakonxínni Ìnchéni la ikui kjuachaxin Nchakuen Dios tí tjén tí janhan la kujnhan kixin nóton tí janhan ijnko nkexro nixja imá itsen éxí itén ijnko trompeta.

¹¹ Mé ntáchro ch'án kixin:

—Janhan mé tí xrankíxixín la ko tí tsjixixín éxí tí letra xrankíxixín A la tsjixixín Zeta. Mé tsokjian jaha ijnko xroon kaín tí nkehe k'uíquān kíxín tsochr'enhén tí yato nínko tjejó tí estado Asia na mé tí nínko tjen chjasin Éfeso, la Esmirna, la Pérgamo, la Tiatira, la Sardis, la Filadelfia, la ko Laodicea —ichro ch'án.

¹² Ntá nkátjá tsjahā kíxín nkexro itén tí tjenix-jana ntá xríñahya k'uíquān yato candelero tsík'óna chica oro.

¹³ A ntá chríkjan tí yato candelero k'uíquān ijnko nkexro éxí yóhe Xjeen Dios tsík'óna chojni. Ntá tí iké ch'án la ika kínjin tjenkáya ch'án hasta tsíkóyóhe toté ch'án la ko mé chóna ijnko cinta jehó oro tjenkáni ntakuin ch'án.

¹⁴ Tí kaxihí ch'án la tjóá éxí kaxree kolélo tjóá o éxí chrinta tsjehe la ko tí ikon ch'án la éxí xrohi nene tsjehe.

¹⁵ Ntá tí toté ch'án la éxí chica sine tjákini na ntá tsík'axrjexín tja. A ntá tí itén ch'án la itsen éxí tóvéntó nchónhya ntario.

¹⁶ A ntá tí tja ch'án chjina mé chóna yato konotsé. A ntá tí ir'va ch'án k'uaxrjexín chica espada iyo, yánjin taté. A ntá imá tjákini tsjehe ikon ch'án la éxí yaon t'inkaséyanxín imá.

¹⁷ A ntá tí k'uíquān xíkaha la kjuáchr'ítsinka toté ch'án éxí tsík'éna. A ntá jehe ch'án kjuak'etja tja ch'án chjina chrítaón tí janhan ntá nixjana ch'án ntáchro ch'án kíxín:

—Chrakonhya jaha. Janhan mé tí xrankíxixín la ko tí tsjixixín.

¹⁸ Janhan tí nkexro tjechón. Ik'uén, a ntá ijie la tjéchuān inaá la itjén jnkochríxín. Amén. Janhan

chonta llave kuènte chojni its'en la ko kuènte tí síin tí sín tsík'en.

¹⁹ Méxra ikjian jaha tí nkehe k'uíkuan mé tí nkehe síin ijie la ko tí nkehe tsonhen chr'éxin.

²⁰ Ninkexró k'uékienxínhya nkexrí t'axrjexín tí yato konotsé k'uíkuan chonta tjana chjina, la ko tí yato candelero tsík'óna chica oro. Mé tí yato konotsé t'axrjexín kixin tí yato ángel t'ayakonhen tí yato ninko la ko tí yato candelero k'uíkuan me kjaxin t'axrjexín tí yato ninko.

2

Tí tan k'uáyéhe tí yato ninko: Tí tan k'uáyéhe tí sín chjasin Éfeso

¹ Tsokjian tí nkehe ts'áyéhe tí ángel t'ayakonhen tí ninko Éfeso: “Xikaha ichro tí nkexro chóna yato konotsé itja ch'án chjina la ko xritjak'e ch'án jnkosiné tí yato candelero tsík'óna oro. Ntáchro xikihi:

² Janhan nòna kaín tí xra ch'erá la ko nòna kixin tóxrjíanhyará tí sín jínahya. Janhan la ó nòna kixin kjuich'erá prueba tí sín ntáchro kixin apóstol tí jehe sín la ntá jehya la ntá kónoxín kixin xrich'ia tí jehe sín.

³ Nchónhya kjuasótiará la kjónté chonhénra kóninkákonhyará la imá kjuich'erá xra kixin tinkachónkirá nina la ko nunca kóxrjéhyará.

⁴ Kjánchó tjánchía ijnko jie tí jahará kixin tinkachónkihyará éxi kjuankíxixínra k'uétjuanará.

⁵ Méxra chróxráxinkáonra kixin ó kuitohérá tí k'uétjuanará la ntá chrókjuínkirá tí nkehe tjenkayáxinra la ko chrókjuich'erá xra éxi tí kjuankíxixínra. A ntá tí náhi, la tjoka tsjasán la

tsjakiyan tí candelero tí tjejorá tí nunca tsjínkíhyará tí nkehe jínahya tjenkayáxinrá la tí tsokjanhyará tsoxráinkáonrá Dios.

⁶ Kjánchó chrókónohará kixin tóxrjina tí nkehe tjejoch'erá kixin tóxrjánhyará tí xra ch'e tí sín nicolaítas kixin kjaxin janhan nínkakonhan tí nkehe ch'e sín.

⁷ Tí nkexro tjinkaon chrókuinhin la chrókuinhin sín tí nkehe nixjehe Nchakuen Dios tí nínko ntáchro kixin: Tí sín tsjacha sinchexiteyàna sín la tsotjahá sín kjuachaxin sine sín tí to t'óna tí nta tjanjon kjuachón itjen tí tjen Dios.”

Tí tan k'uáyéhe tí sín chjasin Esmirna

⁸ 'Ikjian tí nkehe ts'áyéhe tí ángel t'ayakonhen tí nínko Esmirna: “Xíkaha ichro tí nkexro xrankíxín la tsjixixín, mé tí nkexro ik'uén la ntá jie tjechón:

⁹ Janhan la ó nòna kaín nkehe tjejoch'erá. Ó nòna kixin nkexrí tjejótjasótiará la ko ó nòna kixin nòará kjánchó jehya. Náhí. Jehé sín mé tójnksé sín tí nínkoé tí Jínahya.

¹⁰ Kjánchó chrakonhyará kjónté tsjasótiará. Tí ch'ín Tsochren tsochr'ánxanhanrá ntoechiso jnkojín tí jahará kixin tsotsjexín nkexrí tí jahará ntá t'ichjánxin tsjasótiará iso yaon. Kjánchó chrókuítóéhyará Dios kjónté chrók'uenrá ntá janhan tsotjáhará tí kjuachón chr'éxin.

¹¹ Tí nkexro tjinkaon chrókuinhin la chrókuinhin tí nkehe nixjehe Nchakuen Dios tí nínko: Tí nkexro tsjacha sinchexiteyàna sín la í tsjasótehya, la tí yóxin its'en chojni la í ts'enhya tí jehé sín.”

Tí tan k'uáyéhe tí sín chjasin Pérgamo

12 'Tsokjian tí nkehe ts'áyéhe tí ángel t'ayakonhen tí nínko Pérgamo: “Mé xíkaha ichro tí nkexro chóna chica espada yánjín taté:

13 Janhan ó nòna kaín nkehe tjejoch'erá la ko ó nòna nketí tjejorá kixin tí tjejorá la t'etoan ch'ín Satanás la kjónté la jína kuinkachónkirá tí janhan. Jahará kuítóéhyará kuinkachónkirá tí janhan kjónté tí yaon tsík'en ch'ín Antipas, ijnko nkexro kjuínchexiteyàna jína. Jehe sín tsík'óyánxin sín ch'án tí tjejorá ntiha kixin ntaha t'etoan ch'ín Satanás.

14 Kjánchó janhan tjánchía ijnko jie tí jahará kixin iso nkehe ntoáhya ch'erá. Siín ntiha chjasin Pérgamo tí tjejorá iso sín tjinkakonhya sín tsítóhe sín tí nkehe k'uékjako ch'ín Balaam, tí nkexro k'uék'etuñhen ch'án tí ch'ín Balac kixin tí sín israelita chrókjuasin sín jie chrókjóne sín tí nkehe tsíkjokehe sín tí nkehe tsíkjanoya la ko chróchóna sín chojni chjin ókjé chrókjuasinko sín jie.

15 Kjaxin xíkaha tí tjejorá la siín iso sín tjinkakonhya sín tsítóhe sín tí nkehe tjako tí sín nicolaítas. Janhan mé tjínkakonhya tí sín a.

16 Méxra chrókjanrá chrókuinkachónkirá Dios. A ntá tí náhí, la tjoka tsjasán tí tjejorá la tsjánjonkianxian sín tí espada t'axrjexín ir'va.

17 Tí nkexro tjinkaon chrókuinhin la chrókuinhin sín tí nkehe nixjehé Nchakuen Dios tí nínko ntáchro kixin: Tí nkexro tsjacha sinchexiteyàna sín la tsotjahá sín kjuachaxin chrókjóne sín maná tjechónhen la ko tsotjahá sín ijnko xro tjóá la tí xro la ts'ínixín ihnjé sín nixin chónhya ninkexró. Jehó tí nkexro ts'áyéhe mé tsonohe.”

Tí tan k'uáyéhe tí sín chjasin Tiatora

18 'Tsokjian tí nkehe ts'áyéhe tí ángel t'ayakonhen tí nínko chjasin Tiatira: “Mé xíkaha chro tí Xjeen Dios, tí nkexro ikon éxí yóhe xrohi nene sít'axrjexín la ko toté éxí chica sine tjákiní tsjehe.

19 Janhan ó nòna kaín tí nkehe tjejoch'erá la ko ó nòna kixin tjuanará la ko tinkachónkirá tí janhan la ko ó nòna tí xrá tjejoch'erá la ko ó nòna kixin tjejochonhénrá tóninkákonhyará. La ko ó nòna kixin antsí tjejoch'erá xrá ijie ntá tí kjuankíxixínrá la kénhyó.

20 Kjánchó tjánchíá ijnko jie tí jahará kixin tjánjonrá kjuachaxin tjako tí tjan Jezabel. Kjaxin ntáchro tjan kixin nixja tjan itén Dios kjánchó ch'iyehé tjan tí sín ch'ena xrá kixin kjaxin sín chrókjuasinko sín jie chojni chjin ókjé la ko chrókjóne sín tí nkehe tsík'óyán sín tsíkjokehe sín tí nkehe tsíkjanoya.

21 A ntá janhan ó kujtoha tjan intsí kixin chrókjuinkí tjan tí tjenkayáxin tjan kjánchó tjinkakonhya tjan sich'e tjan xíkaha la tjinkakonhya tjan chrókuítóhe tjan tí jie tjasinko tjan chojni ntoa.

22 A ntá jie tsjánjuan kjuachaxin tsoníhi tjan tsjak'eták'á tjan cama la ko kjaxin tsjasóte kaín tí nkexro kjuasinko tjan jie tí nunca tsítóehya sín tí nkehe tjinkaon tjan sich'e tjan.

23 A ntá janhan ts'oyán tí xjeen tí jehe tjan. Ntá kaín tí nínko tsonoexín sín kixin janhan choxian nkehe tónhen asén kaín chojni. A ntá jnkojnko tí jahará la tsjénkahará nkexrí tí xrá kjuich'erá.

24 A ntá tí í sorá tjejorá chjasin Tiatira tí

chréhyará tí nkehe ntoáhya tjako sín la ko tjinkákonhyará chrókónohará tí nkehe jínahya kuènte ch'ín Tsochren la xíkahó la í tsétuánhyará í jnko xra.

²⁵ A ntá jahará la tí nkehe ó chontará la t'ayakonhénrá hasta tsokjan janhan.

²⁶ A ntá tí sín tsjacha sinchexiteyàna sín la ko xíkaha sich'e sín hasta tsjixixín kixin janhan tjínkavan xíkaha chrókjuich'e sín na mé janhan tsjánjuan kjuachaxin ts'etuènen sín kaín naciòn.

²⁷ Na mé xíkaha T'aná mé chjìna kjuachaxin tsétoan la kjaxin xíkaha jehe sín mé ts'etuènen sín tí naciòn yóhè chróchónta sín ijnko chica vara kixin chróchjéhe sín tí chjì chrók'ókuen tí chjì tsík'óna nchetje.

²⁸ Me kjaxin tsotjaha sín tí konotsé tí tji nchítjen.

²⁹ A ntá tí nkexro tjinkaon chrókuinhin la chrókuinhin tí nkehe nixjéhe Nchakuen Dios tí nínko.”

3

Tí tan k'uáyéhe tí sín chjasin Sardis

¹ Tsokjian tí nkehe ts'áyéhe tí ángel t'ayakonhen tí nínko chjasin Sardis: “Xíkaha ichro tí nkexro chóna yato Nchakuen kuènte Dios la ko chóna tí yato konotsé: Janhan nòna kaín nkehe ch'erá, ó nòna kixin éxí tsík'en tí xra ch'erá kjónté nchehnerá kixin tjejochónrá.

² T'àyará. Naxa t'ayakonhénrá kjónté í tsjéhya tí nkehe kuitohe kixin kjaxin tíha mero its'en. Ó k'uíkuan kixin tí xra ch'erá la t'ikon tí Dios kuèntana kixin ntoáhya.

³ Chróxráxinkáonrá tí nkehe tsíxrakohará la ko tíha chrókjuich'erá la chrókjanrá chróxráxinkáonrá Dios. A ntá tí naxa tjejochrinrá la titàya tsjasán éxí ijnko síchee la tsonohyará nkesá tíha.

⁴ Kjánchó naxa síin iso chojni ntaha chjasin Sardis naxa kjuínchekjitahya sín iké sín la jehe sín la ts'ájkian sín kíxin chóna sín ka tjóá kíxin jehe sín la jína sín.

⁵ Tí sín tsjacha sinchexiteyána sín la ts'áyéhe sín ka tjóá ts'inkáya sín la ko tsoxíkahya ihnié sín chóna tí libro ts'ínixín ihnié tí sín tsaá la ko tsochoxian sín nkayakon T'aná la ko nkayakon tí sín ángel kuènte ch'án.

⁶ Tí nkexro tjinkaon chrókuinhin la chrókuinhin tí nkehe nixjehe Nchakuen Dios tí nínko.”

Tí tan k'uáyéhe tí sín chjasin Filadelfia

⁷ Tsokjian tí nkehe ts'áyéhe tí ángel t'ayakonhen tí nínko chjasin Filadelfia: “Xíkaha ichro tí nkexro tjóá la ko chaxín mé tí nkexro chóna llave kuènte ch'ín rey David. A ntá tí tsakitjehe ch'án puerta la ninkexró tsjachahya ts'ikjéhe, a ntá tí ts'ikjéhe ch'án puerta la ninkexró tsjachahya tsakitjehe.

⁸ Janhan ó nòna kaín nkehe tjejoch'erá. Kjuaké tí tjejorá ijnko puerta xitjehe la ninkexró xitjahya ts'ikjéhe. Kjónté intsíkoá kjuachaxin chontará la jahará kjuínchexiteyará tí nkehe kjuàkua la ko kjuínchemáhyará tí janhan.

⁹ Tí sín tsíkitekaon Satanás la ntáchro sín kíxin judío sín kjánchó jehya sín, xrich'ia sín la chr'éxin tsétuanhan sín ts'ejóxin toch'in sín chrínkí totará la ntá tsonohé sín kíxin chaxín janhan tjuahará.

10 Ó kuítekáonrá tí nkehe kuétuānhanrá la jína tjejórá la mé xíkaha janhan ts'ayakonhanrá tí ichrén nkehe tsonhanrá tió tsi tí nkehe tsonhen kuenté chjasintajni kixin ó jehí xíkaha tsonhen kaín chojni tjejó chjasintajni.

11 Janhan mé tjoka ts'inka. Méxra t'ayakonhénrá tí nkehe chontará kixin ninkexró chrókuakitsjahaará tí nkehe ó kjuachará.

12 Tí nkexro tsjacha sinchexiteyàna la ts'óna sín columna kuènte nínko kuènte Dios kuèntana la nunca xitjahya sátsjixin sín ntiha. La janhan tsokjian ihnié tí Dios kuèntana tsjiko sín la ko tsokjian ihnié chjasén Dios kuèntana mé tí Jerusalén nixin tsixin nkajní tí tjen Dios kuèntana. Kjaxin tsokjian nina nixin tsochónta sín.

13 Tí nkexro tjinkaon chrókuinhin la chrókuinhin tí nkehe nixjehe Nchakuen Dios tí nínko.”

Tí tan k'uáyéhe tí sín chjasin Laodicea

14 'Tsokjian tí nkehe ts'áyéhe tí ángel t'ayakonhen tí nínko chjasin Laodicea: “Xíkaha ichro tí nkexro chaxín ntoá mé tí nkexro chrónka tí nkehe chaxín. Tí kjuachaxién ch'án kjuích'énaxín Dios kaín nkehe.

15 Ó nòna kaín nkehe tjejóch'erá. Ó nòna kixin jahará la ní jehya kinrá o sóará. Chrókóchaxín chrókókinrá o chrókóchaxín chrókósóará.

16 A ntá jahará la yásorá la jehya ikinrá la jehya sóará. A ntá ijie ir'va ó tsíkia tí jahará la ts'itjia.

17 Ntáchrórá kixin jahará rícorá la imá jína tjejórá la ko ninkehó t'itjáyanhya tí tjejórá, ichrorá. Kjánchó chontahyará kjuachéhe la ko jehya jína tjejórá la ko nòará la ko ntakótánrá la ko tjóchínrá.

18 Méxra ijie ntaxraxinkáonrá janhan sintakjihará tí nkehe oro náxrjón ts'ík'axrjexín tja kixin ntá chaxín ts'ónará rico. La ko janhan sintakjihará ika tjóá kixin ts'ínkayará ntá tsjinhanrá kjuatósuèhe kixin í tjóchínhyará. La ko janhan tsjánjuan xroan kolirio tsjiankí ikonrá kixin ts'ikonrá.

19 Janhan mé tsjéntuáha kaín tí sín tjuaha. Méxra íchá jína chrókJan sín chrókuinkáchónki sín Dios.

20 Tsjehérá janhan itjén ntója puerta, tjét'eya. A ntá jnkojín nkexro chrókuinhin tí tanná ntá chrókuakitjehe tí puerta ntá chrók'uixanhan ntoe sín la chrókjónekian sín la ko jehe sín la ko janhan.

21 A ntá tí sín chrókjuacha chrókjuinchexiteyána la tsjánjuan kjuachaxin ts'ejókian sín tí tétóanxian ntiha la éxí xíkaha janhan kjuacha ntá T'aná kjuanjon kjuachaxin tjékian ch'án tí tjen ch'án t'etoan ch'án ntiha.

22 Tí nkexro tjinkaon chrókuinhin la chrókuinhin tí nkehe nixjehe Nchakuen Dios tí nínko.”

4

Tí sín tjikosáyehe Dios nkaya nkajní

1 Ntá chr'éxin janhan k'uíquān ijnko puerta tjexrankehe nkaya nkajní. Ntá kuinhān ijnko itén nkexro éxí trompeta mé tí nkexro nixjana tí xrankíxixín, ntá jehe ch'án nixjana ch'án, ntáχρο ch'án kixin:

—T'ít'ótjen ntihi ntá tsjákoḥa kaín nkehe tsonhen chr'éxin.

2 Ntá tuénxín ikui tí kjuachaxin kuènte Nchakuen Dios k'uayáha ntá k'uíquān tí trono itjen nkaya nkajní ntá ntiha tjetjāxin ijnko nkexro.

³ A ntá tí ch'ín tjetjaxin tí trono mé tjákini tsjehe éxí ixro jaspe o ixro cornalina. A ntá jnkontatjen tí trono itjen ijnko konchecha tjákini tsjehe éxí ijnko xro esmeralda.

⁴ A ntá kjaxin jnkontatjen tí trono k'uíquān í so veinticuatro trono kjaxin tjejójtjaxin veinticuatro sín táda, iké sín la tjóá la ko tjejóya kja sín corona tsík'óna chica oro.

⁵ A ntá tí trono kuènte Dios la ntiha sít'axrjexín tí sítjónkíxín la ko sítjonta. A ntá nkayakon tí trono a kjaxin tjejóche yato xrohi la mé tí yato Nchakuen Dios.

⁶ A ntá nkayakon tí trono la kjaxin itjen ijnko ntayaon éxí xroxrjo tsjehe.

A ntá tí jnkosiné la ko jnkontatjen tí trono tjejó noó nkexro tjejóchón chóna nchónhya ikon nkayakon la ko nóton.

⁷ A ntá tí nkexro tjechón k'uíquān saoxín mé éxí koxra tsjehe. A ntá tí nkexro yóxin tóyóhe éxí koxinta, a ntá tí nkexro níxin tsjehe éxí chojni. A ntá tí noóxin la éxí kotjuānhnko xritjaká tsjehe.

⁸ A ntá jnkojnko tí noó nkexro tjejóchón chóna injon kanenee sín la chóna nchónhya ikon nóton la ko nkaxenhen, la nchakotjin la ko tie títoehya sín ntáchro sín kíxin:

Santo, santo, santo,

Ìnchéni Dios, jaha chonta kaín kjuachaxin,

jaha xráxín tjen la ko itjen ijie la ko jaha ts'inka ínaá.

⁹ A ntá tí nkexro tjejóchón jnkoyaxon tíó tjanchia sín kjuasáyé Dios la ko tjikosáyehé sín ch'án la ko nixjehe sín ch'án chjéhe sín kjuasáyé tí nkexro tjetjaxin tí trono mé tí nkexro tjechón jnkochrín.

¹⁰ La ntá tí veinticuatro tí sín táda tjejóxin toch'in sín nkyakon ch'án ntiha la tjikosáyehe sín tí jehe ch'án kixin jehe ch'án tjechón jnkochrín la ko tjakjinjin sín corona tjoka sín tí tjen tí trono la ntáchro sín kixin:

¹¹ Ìnchéni Dios kuèteni, jaha la imá jina la t'ayéhé kjuasáya kixin tjikosáyahani tí jaha kixin tí kjuachaxin chonta;
kixin jaha kjuich'éna kaín nkehe siín kixin jaha kóxrjínhan xikaha k'óna.

5

Tí libro la ko tí Kolélo

¹ A ntá tí tja chjina tí nkexro tjetjaxin tí trono, k'uikuān ijnko libro mé tsíkjin sín nkaxenhen la ko nóton la ko mé tsíkjèxin yato sello.

² La k'uikuān ijnko ángel chóna kjuachaxin ntá kjuanchankí ch'án itsen ntáchro ch'án kixin:

—¿Nkexro tí jina chrókjuacha chrókuakitjehé tí libro la ko chrókóchrítōn tí sello chóna?

³ La ninkexró ní nkajní o ní chjasintajni o ní chrínkí nonte tsjachahya tsakitjehé tí libro la ní komáhya sín.

⁴ A ntá janhan la imá tsjanka kixin naxa tónoxínhya ninkexró chrókjuacha chrókuakitjehé tí libro o chrókjuinchekuáxin tí libro o chrókomá nkehe tí ntáchro tí libro.

⁵ Ntá ijnko tí sín táda ntá nixjana ntáchro kixin:

—Tsjankahya, tsjehé ntihi tí Koxra k'uaxrjenínin Judá la ko tsík'axrjenínin rey David. Mé kjuacha la ó tsjacha tsakitjehé tí libro la ko tsóchrítōn tí yato sello —ichro ch'án.

⁶ A ntá jnkosiné tí trono la ko tí tjejó tí noó tí nkexro tjejóchón la ko jnkosiné tí tjejó tí sín táda ntaha mé k'uíkuan tjejin toté ijnko Kolélo tsjehe éxí tsík'óyán sín mé chóna yato ntée la ko yato ikon. A ntá tí kon mé tí yato Nchakuen Dios la táha mé tsík'ítuenhen t'ayakonhen kuenté chjasintajni.

⁷ A ntá tí Kolélo a kuákja tí libro itjen tja chjina tí nkexro tjetjaxin tí trono.

⁸ A ntá tió k'uáyéhe ch'án tí libro la ntá tí noó sín tjejóchón la ko tí veinticuatro tí sín táda k'uéjóxin toch'in sín nkayakon tí Kolélo. A ntá kaín tí jehe sín chóna sín ison arpa la ko xraá sín ihnti tsík'óna chica oro tsíkaón chjincó. Tíha mé oración nixjehe Dios kaín tí sín tsíkjinchetjóá ch'án.

⁹ Itsje sín nkehe nixin ntáchro kixin:
 Jaha mé ijnko nkexro jina kjuacha kuákja tí libro la ko kóchrítuan tí sello;
 kixin tsík'óyán sín tí jaha la ko tí ijniá k'uenañian tí jeheni ts'áyéhe Dios,
 mé ts'áyéhe ch'án kenxín chojni kjónté nkexrí tsjehe sín la ko kjónté nkexrí nixja sín la ko chojni kénxín chjasin la ko kaín nación.

¹⁰ Jaha tsík'ich'énani reyes la ko nchát'á sich'eheni xra Dios kuènteni,
 la ko jaha tsík'jánjuan kjuachaxin ts'etoanni chjasintajni.

Mé xikaha ichro sín.

¹¹ Ntá tuénxín k'uíkuan la ko kuinhan itén nchónhya sín ángel tjejó sín jnkontatjen tí trono la ko tí sín tjejóchón la ko tí veinticuatro tí sín táda. Nchónhya millones la ko millones tí jehe sín.

¹² Itsen nixja sín ntáchro sín kixin:
 Tí Kolélo tsík'óyán sín,

tíha mé kjuacha k'uáyéhe kjuachaxin ts'etoan la ko
k'uáyéhe tí nkehe tjete kuènte Dios,
la ko tí kjuaxrexinkaon jína la ko kjuachaxin sich'e
xra

la ko mé xikaha tjikosáyeheni ch'án.

¹³ Kjaxin kuinhan kixin kaín nkehe kjuich'éna
Dios síin nkajní la ko chjasintajni la ko tí nkehe síin
chrínkí nonte la ko kaín nkehe síin ntayaon la kaín
tíha mé ntáchro kixin:

Chjéheni kjuasáya tí nkexro tjetjaxin tí trono la ko
tí Kolélo

kixin chóna kjuachaxin jnkochrín.

¹⁴ A ntá tí noó sín tjejóchón ntáchro sín kixin:

—Xikaha tsonhen. Amén.

La ko tí veinticuatro tí sín táda k'uejóxin toch'in
sín la chjéhe sín kjuasáyé tí nkexro tjechón
jnkochrín.

6

Tíyato sello

¹ A ntá k'uikuán kixin tí Kolélo kóchríton tí
xránkíxixín tí yato sello ntá kuinhan ijnko tí noó tí
noó tí sín tjejóchón nixja ch'án éxí kjóna, la ntáchro
ch'án kixin:

—Xrákiá tsjehé.

² Ntá k'uikuán ijnko kokate tjóá. A ntá tí nkexro
tjekjen tí kokate chóna ch'án ijnko arco tí tja ch'án
la tsík'áyéhe ch'án ijnko corona. Jehé ch'án mé
kjuacha ch'án la naxa xikjacha ch'án inaá.

³ A ntá tí Kolélo kóchríton tí yóxin sello ntá
kuinhan tí nkexro yóxin tjechón ntáchro kixin:
—Xrákiá tsjehé.

⁴ Ntá sákjuí í jnko kokate kjátse. A ntá tí ch'ín tjejen k'uáyéhe ch'án kjuachaxin tsjakjin tí kjuaxróxin síin chjasintajni kixin ntá chojni mé ts'óyán kichó sín kixin jehe ch'án mé tsík'áyéhe ch'án ijnko espada ijié.

⁵ A ntá tí Kolélo kóchríton tí nixin sello la ntá kuinhan nixja tí nixin nkexro tjechón ntáchro kixin:
—Xrákiá tsjehé.

Ntá k'uíquān ijnko kokate tié. A ntá tí nkexro tjejen tí kokate chóna itja ch'án ijnko báscula.

⁶ La ntá kuinhan itén ijnko nkexro jnkosiné tí tjejó tí noó sín tjejóchón mé ntáchro kixin:

—Jehó ijnko kilo trigo ijnko chichaon denario la ko iní kilo cebada ijnko chichaon denario. Kjánchó chrókjuinchek'itjáyanhya tí aceite la ko tí vino. (Tíha mé t'axrjéxín tsokjinta.)

⁷ A ntá tí Kolélo kóchríton tí noóxin sello ntá kuinhan tí noóxin tí nkexro tjechón ntáchro kixin:
—Xrákiá tsjehé.

⁸ Ntá k'uíquān ijnko kokate sine. A ntá tí ch'ín tjejen va a mé it'in ch'án Muerte. A ntá nóton tí jehe ch'án la ikui nkehe tóyóhe tí tjejó tí sín tsík'en. Jehe ch'án k'uáyéhe kjuachaxin ts'etōan ch'án noóxin parte chjasintajni kixin ntá ts'óyán kichó sín la tsokjinta la ko ts'enxín sín ichin la ko kaín ko jiehe síin chjasintajni mé tsjāya va.

⁹ A ntá tí Kolélo kóchríton tí n'óxin sello ntá k'uíquān chrínkí tí altar tí asén tí sín tsík'enxín tí tan kuènte Dios tsíchrónka sín.

¹⁰ Ntáchro sín itsen kixin:

—Jaha mé Ìnchéni tjóá jína la jaha mé sinchexiteyá tí nkehe tsíntáchrúa, ¿la nkesá

şınchekitoexián ijié tí sín siín chjasintajni tsík'óyán tí jeheni? —ichro sín.

¹¹ A ntá tí sín a mé k'uáyéhe sín iké sín tjóá ntá k'uítuenhen sín naxa ts'ok'éhe sín í so yaon tsoxetajia tí número tí kíchó sín ch'ehe xra Cristo naxa ts'enxín sín éxí k'uén tí jehe sín.

¹² A ntá tí Kolélo kóchrítõn tí injonxin sello ntá xrínahya imá kuínkí nonte. A ntá tí yaon la kótié éxí ika tjiko chojni tsík'en. A ntá nitjó k'óna kjátse éxí jni.

¹³ A ntá konotsé sít'ánótjenxin nkajní sítjitsínka nonte éxí yóhe tí inta t'óna to higo la síxènjín tí to yoa tió tsjixraya tí nta kixin tí imá fuerte chjéhe xrinto.

¹⁴ A ntá nkajní k'uitjáyan éxí ijnko xroon tsíxrèya. Ntá kaín jna la ko tí nonte ntsíntsí siín jnkõsiné ntayaon sákjuí ókjé.

¹⁵ A ntá kaín tí sín reyes siín chjasintajni la kjaxin tí sín t'etõan la ko chojni rico la ko comandante la ko tí sín chóna kjuachaxin la ko kaín tí sín ch'exón xra la ko tí chojni náhí mé k'uíxenhen sín tjo siín nteje ts'ejómáxin sín.

¹⁶ Ntáche sín tí jna la ko tí tjo kixin:

—Xrákiá xrátja tí jeheni nchemáni kixin chrók'uikonhyani tí nkexro t'etõan tjetjaxin trono la ko chrókjuasótehyani tí kjuachrakon jié tsjanjon tí Kolélo.

¹⁷ Kixin ó kui tí yaon imá jié kuènte kjuachrakon la, ¿xá nkexro chrókjuacha chrók'uejó ntiha?

7

Tí sín israelita chóna sello

¹ A ntá chr'éxin k'uíkuan noó sín ángel tjejóxin toté sín la jnkojnko sín tjejó sín tí chrínta chjasintajni chóntehe sín tí noó xrínto kíxin tsochjéhya xrínto chjini chrítaón chjasintajni la ko ní chrítaón ntayaon la ko nijnko tí nta yoa.

² Kjaxin k'uíkuan í jnko ángel kjuixin nó tjitoxin yaon la chóna sello kuènte Dios tjechón. Ntá tí ángel mé k'uíyehé ch'án itsen tí noó ángel tsík'áyehé kjuachaxin sincheníhi nonte la ko ntayaon.

³ Ntáchro ch'án kíxin:

—Náhí, sincheníehya nonte la ko ntayaon la ko kjaxin tí nta la náhí tí naxa tsíkahya sello totjen tí sín ch'ehe xra Dios kuènteni.

⁴ Kujnhan tí número tí sín tsíka sello la me ciento cuarenta y cuatro mil kain tí sín tsík'axrjeníxin tí sín israelita.

⁵ Teyó mil tí sín tsíka sello tsík'axrjeníxin tí Judá la ko teyó mil tí sín tsíka sello tsík'axrjeníxin Rubén la ko teyó mil tí sín tsíka sello tsík'axrjeníxin sín Gad

⁶ la ko teyó mil tí sín tsíka sello tsík'axrjeníxin sín Aser, la ko teyó mil tí sín tsíka sello tsík'axrjeníxin sín Neftalí la ko teyó mil tí sín tsíka sello tsík'axrjeníxin sín Manasés

⁷ la ko teyó mil tí sín tsíka sello tsík'axrjeníxin sín Simeón la ko teyó mil tí sín tsíka sello tsík'axrjeníxin sín Leví la ko teyó mil tí sín tsíka sello tsík'axrjeníxin Isacar

⁸ la ko teyó mil tí sín tsíka sello tsík'axrjeníxin sín Zabulón la ko teyó mil tí sín tsíka sello tsík'axrjeníxin José la ko teyó mil tí sín tsíka sello tsík'axrjeníxin sín Benjamín.

Sín nchónhya chojni chóna ka tjóá

⁹ Ntá kjuixin tíha ntá k'uúkuḡn nchónhya chojni kaín xín nación la ko kaín xín nkexrí tsjehe sín la ko kaín xín nkìva la ko kaín xín chjasin mé tjejóxin tṵté sín nkayakon tí trono la ko nkayakon tí Kolélo. Nchónhya sín la kohya ninkexró tsjacha ts'ekin nkekjaín tí jehe sín la tjejóya sín ka tjóá la tjejóya kajni tja sín.

¹⁰ Kaín sín itsen nixja sín ntáchro sín kixin: Dios kuènteni mé kjuínchekaáni. Jehe ch'án mé tjetjḡxín tí trono tí tjen tí Kolélo kjuínchekaáni.

¹¹ Kaín tí sín ángel tjejóxin tṵté sín jnkontatjen tí trono la ko jnkontatjen tí sín táda la ko tí noó sín tjejóchón la ntá k'uejóxin toch'in sín la k'uúsen sín hasta káxín ikja sín nonte nkayakon tí trono la tjanchehe sín kjuasáye Dios.

¹² Ntáchro sín kixin: Amén. Kjuíncheyaonni Dios la tsochjéheni Dios kjuasáya kixin kaín tí kjuaxrexinkaon jína tjanjon ch'án la ko tjancheheni ch'án kjuasáya.

Tsjikosáyeheni tí kjuachaxin kuènte ch'án kixin tjinkitsani ch'án jnkochrín. Amén.

¹³ A ntá ijnko tí sín táda kjuanchankìna, ntáchro kixin:

—A ntá tí sín tjejóya ika tjóá la, ¿xá nkexro tíha? la ko ¿xá nketí tsíkjḡxín sín?

¹⁴ Ntá janhan ntáxrjḡn kixin:

—Ìnchéni, jaha ó noha. Ntá jehe ch'án ntáchro ch'án kixin:

—Tí sín i tsíkjḡxín sín tí kjuaxróxinhya k'uék'ejó sín, la tí sín a mé tsíjen sín iké sín la ko tsíkótjuáxin ijnié tí Kolélo.

¹⁵ Méxra xikaha ntá ijie tjejó sín nkayakon tí trono kuènte Dios la tjejóch'ehe sín xra Dios nchakotjin la ko tie tí nkaxenhen ninko kuènte ch'án. A ntá tí nkexro tjetjaxin chrítaón tí trono mé t'ayakonhen ch'án sín.

¹⁶ A ntá tí sín a mé ts'enxinhya sín kjinta la ko ts'enxinhya sín ìnta la ko tsochjánxinhya sín yaon la ko ni sóa kohya nkehe sich'ehe sín.

¹⁷ Kíxin tí Kolélo tjen jnkosiné tí trono mé t'ayakonhen ch'án tí jehe sín éxí iko kuènte ch'án la ko sátjiko ch'án tí tjiá ntá tjanjon kjuachón la Dios mé sinchexámá kaín tí ntakon tí jehe sín.

8

Tí yatoxin sello la ko tí ihnti oro

¹ A ntá tí Kolélo kóchríton tí yatoxin sello kuènte tí libro la ntá kohya ninkehó ruido nkajní chjina it'ò hora.

² Ntá tuénxín k'uíkuan yato ángel tjejóxin toté nkayakon Dios la jnkójnko sín k'uáyéhe sín jnkójnko trompeta.

³ Ntá chr'éxin ikui í jnko ángel xraá ihnti tsík'óna chica oro la kjuák'exín toté nkayakon tí altar. K'uáyéhe ch'án nchónhya chjincò tsjak'e ch'án kíxin sátsjiko tí oración kuènte kaín tí sín tsíkjinchetjóá Dios kíxin tsjak'e chrítaón tí altar oro nkayakon tí trono.

⁴ A ntá tí ihnchi kuènte chjincò chrínxín tja tí ch'ín ángel tí tjen Dios la ko kjaxin tí oración kuènte chojni tsíkjinchetjóá Dios.

⁵ A ntá tí ch'ín ángel kuákja ch'án tí ihnti kjuínchekaón ch'án xrinta kuènte xrohi kuènte tí

altar la ik'ue ch'án chjasintajni. La ntá kjónta la ko nchónhya ruido la ko sítjónkíxín la ko kuínkí nonte.

Tí trompeta

⁶ A ntá tí yato ángel mé chóna sín jnkojnko trompeta ó yaxínhin sín kíxin ts'ánoa sín.

⁷ A ntá tí ángel saxín k'uánoa trompeta ntá k'uániá toni la ko xrohi tsínkíkjan jni mé xikaha ikui chrítaón chjasintajni. A ntá iche níxin parte nonte la ko níxin parte tí nta la ko kaín tí kayoa síin.

⁸ A ntá tí yóxin ángel k'uánoa trompeta la ijnko nkehe yóhe tsjehe éxí ijnko jna jíe tjeche la sákjuí kjuíankí ntayaon la ntá níxin parte tí ntayaon la k'óna jni.

⁹ A ntá tí níxin parte kaín tí nkehe síin tí ntayaon la ik'uén la ko níxin parte kaín tí ntabárcɔ la xika.

¹⁰ A ntá tí níxin ángel k'uánoa trompeta la ntá xrínahya k'uánótjen ijnko konotsé jíe k'uánótjenxin nkajní mé tjeche éxí ijnko xrohi jíe. K'uánótjen chrítaón níxin parte ntario la ko tí sít'axrje nta.

¹¹ Tí konotsé mé it'in Itsjá la tsíkjiankí níxin parte tí nta ntá kótsjá tí nta la nchónhya chojni ik'uén kíxin tí nta xikaha tsíkótsjá.

¹² A ntá tí noóxin ángel k'uánoa trompeta la kjuíncheníhi ijnko níxin parte tí yaon la ko níxin parte tí nitjó la ko níxin parte tí konotsé. Méxra tí níxin parte kuítóhe sítié la í kohya t'inkaséyan tí níxin parte tí nchakotjin la ko tí tie.

¹³ Ntá tuénxín k'uíquān la ko kuñhan ijnko ángel tjetjaká jnkosiné nkajní t'èya ch'án itsen, ntáchro ch'án kíxin:

—Nòda tí sín tjejó chjasintajni tió tsontáchro tí trompeta ts'ánoa tí iní ángel ínaá.

9

¹ A ntá tí n'óxin ángel k'uánoa trompeta la k'uíkuan ijnko konotsé tsík'ánótjenxin nkajní chrítaón chjasintajni ntá k'uáyéhe tí llave kuènte tí tòye ninka.

² A ntá tuénxín xitjehe tí tòye ninka ntá ntiha chrìinxín nchónhya ihnchi kuènte tja ntá tí t'inkaséyanxín yaon la ko tí xrìnto k'uúixin tié kixin tí ihnchi kuènte tí tòye.

³ A ntá tí ihnchi mé k'uaxrjexín kochjõa xritjaká chrítaón chjasintajni. A ntá tí kochjõa k'uáyéhe kjuachaxin éxí tí chóna konchia síin chjasintajni.

⁴ K'uítuenhen va kixin sincheníehya va tí kayoa síin chjasintajni la ko ninkehó nkehe yoa la ko ninkehó ntayoa. Jehó chojni chónyahya sello kuènte Dios tí totjen mé sincheníhi va.

⁵ Kjánchó k'uáyèhya va kjuachaxin ts'óyán chojni. Jehó sinchekjoté va chojni hasta in'ó nitjó la tí kjuatjoté mé yóhe kjuatjoté éxí chojni tsíkjinehe konchia.

⁶ A ntá tí yaon a tsotjinkaon chojni chrók'uen sín la ntá xitjahya its'en sín. Kjonté tjinkaon sín chrók'uen sín la tí muerte sátsíkji ókjé.

⁷ A ntá tí kochjõa éxí kokate tsjehe, listo tjen sátsjikjanjon va. A ntá tí ikja va itjen nkehe tóyóhe ijnko corona tsík'óna oro la ko tí kàré la tóyóhe éxí kàré chojni.

⁸ A ntá tí kaxree va tsjehe tóyóhe éxí kaxihi chojni chjin, a ntá tí neno va la tóyóhe neno koxra.

9 A ntá tí cuérpoé la tjekjanjin nkehe tsík'óna chica kixin kohya nkehe tsonhen va. A ntá ruido kuènte kanenee la éxí nchónhya carro tinkánkákjen kokate tió xritinká tí síin kjuanínkaon.

10 A ntá tí ntané va mé tsjiate chojni la éxí ntané konchia, la tíha mé tsochóna kjuachaxin sincheníhi chojni hasta in'ó nitjó.

11 A ntá tí kochjoá mé chóna ijnko nkexro t'etōan mé ijnko ángel kuènte tí tōye ninka. Tí ángel mé nkiva hebreo mé it'in Abadón la nkiva griego la mé Apolión mé t'axrjexín kixin táha mé sinchek'itjayan nkehe.

12 Mé xikaha kónhen tí kjuachrakon xrankíxixín. A ntá naxa t'itjayan yaá inaá.

13 A ntá tí injonxin ángel k'uánoa trompeta la kuinhan ijnko itén nkexro k'uaxrjexín tí tjejó tí noó ntèe kuènte tí altar oro tí tjen Dios.

14 A ntá tí itén tí nkexro ntáche tí injonxin ángel chóna trompeta kixin:

—Tjasintankehé tí noó ángel kuènte tí jínahya tjejóchroé chjinaxón tí ntario jíé it'in Eufrates.

15 Ntá xikaha xintankehe tí noó sín ángel kixin ts'óyán sín tí nixin parte chojni. Mé xikaha yaxínhin sín sátsji sín tí hora la tí yaon la tí nitjó la tí nánó.

16 Ntá kuinhan tí número tí soldado la ko tí kokate la doscientos millones.

17 Mé xikaha xrínahya k'uíkuan tí kokate. A ntá tí sín tjejókjen kokate la tí ntakuín sín chóna nkehe tsík'óna chica kjátse la azul la sine. A ntá tí kokate la ikja la éxí kja koxra la tí ir'va la k'uaxrjexín xrohi la ko ihnchi la ko azufre.

18 A ntá nínxin parte chojni tsík'enxín tí iní clase tí chin tsík'axrjexín ir'va kokate mé xrohi la ihnchi la azufre.

19 Tí kjuachaxin chóna tí kokate la k'uaxrjexín ir'va va la ko tí ntané va. A ntá ntané la éxí konche tsjehe la tí kja va mé sincheníhi chojni.

20 A ntá tí í so chojni kuitohe k'uénxinhya tí chin a la kjónté kjuinkíhya sín tí nkehe tjenkayáxin sín la kuitoehya sín tinkáchónki sín nchakuen jínahya la ko tí nkehe tsíkjanoya chica oro la ko chica plata la ko chica bronce la ko ixro la ko inta, mé tí nkehe t'ikonhya la ko tienhya la ko tjihya.

21 La kjónté xikaha la kuitoehya sín tí nkehe jínahya ch'e la ko tí chrók'óyán kichó la ko tí nchekjiko kichó la ko tí chóna sín chojni chjin ókjé la ko tí tjinkaon sín chrókueé.

10

Ijnko ángel la ko tí librato ntsí

1 Ntá k'uíkuan í jnko ángel imá chonta kjuachaxin k'uínkajinxin nkajní tjenkakjan ch'án tjuj la ko injko konchecha chrítaón tí ikja ch'án. A ntá tí kàré ch'án imá tjákini tsjehe éxí yaon, a ntá tí toté la éxí xrohi síchr'ákjen.

2 Tjexraá ch'án injko libro ntsí tjexrankehe, la ntá toté ch'án chjina la chrítaón ntayaon la ntá toté ch'án kjon la chrítaón nche.

3 Ntá xrínahya k'uèya ch'án itsen éxí injko koxra tsjánka va tí tónínkaon va mé xikaha k'uèya la yato kjónta kjuáteyá tí itén ch'án.

4 Ntá kjuixin ntáchro tí yato kjónta la chrókjian ntá kuinhan injko itén nkexro nkaya nkajní ntáchro kixin:

—Chróchronkahya tí nkehe ntáchro tí yato kjónta la ko ni chrókjinhya tíha.

⁵ Ntá tuénxín tí ángel k'uíkuan ijnko toté tjekjen ntayaon la ijnko toté tjekjen nche ntá kjuaya tja chjina nó nkajní.

⁶ Ntá kjuasin ch'án testigo tí nkexro tjen jnkochrín mé tí nkexro a mé kjuích'éna nkajní la ko chjasintajni la ko ntayaon la ko kain xín nkehe síin la ntáchro ch'án kixin:

—Í séhya má naxa tsoxrjen

⁷ ntá tsjixraká tí yaon tí yatoxin ángel ts'ánoa trompeta ntá tsoxiteyá tí nkehe jehó Dios nohe kixin xikaha tsíchénka ch'án tí sín k'uékjich'ehe ch'án xra ósé k'uéchrónka sín itén ch'án.

⁸ A ntá tí itén nkexro kujnhan k'uaxrjexín nkaya nkajní ntá xínixjana ínaá ntáchro kixin:

—Sátjia tákjá tí libro ntsí tjexrankehe tjexraá tí ángel itjen toté ch'án chrítaón ntayaon la ko chrítaón nche.

⁹ Ntá sákjuia kjuáncháha tí ángel tí libro ntsí ntá jehe ch'án ntáchro ch'án kixin:

—Tákjá la inte. A ntá tí ir'va la tsoxé éxí tsjen kjánchó tí tsa la tsotsjá.

¹⁰ Ntá kuákjaá tí libro ntsí tjexraá tí ángel ntá kjonè. A ntá ir'va kóxé éxí tsjen ntá chr'exin la kótsjá nkaya tsena.

¹¹ Ntá tuénxín k'uetuanna ch'án kixin:

—Ínaá tsochronkaxián itén Dios tsinhin nchónhya chjasin la nación la ko nkiva la ko tsinhin tí sín reyes.

11

Iyó testigo

¹ A ntá chjìna ch'án ijnko ntavara éxí tji tsjehe tsjáchrōaxián ntá ntáchrō ch'án kíxin:

—T'àyá tjáchrōa nkaxenhen n̄inko kuènte Dios la ko tí altar la tékia nkekjaín nkexro tjejó ntiha tinkáchónki Dios.

² Kjánchó tí ntasin itjen ntója n̄inko la tjáchrōahya kíxin táha ó tsík'áyéhe tí sín tsíkjix̄in kjín la ntá jehe sín tsjikosáyehya sín tí chjasin tjóá Jerusalén ijnko cuarenta y dos nitjó.

³ A ntá mé janhan tsochr'an iyó testigo kuèntana tsonixj̄ax̄inna mil doscientos sesenta yaon. Tí iké sín la ìka tié ts'ejóya sín.

⁴ Tí yaá testigo i mé iyó nta olivo la ko iyó candelero tjejó tí tjen Ìnchéni kuènte chjasintajni.

⁵ A ntá tí jnkójín sín tjinkaon sich'ehe sín daño la jehe sín la xrohi ts'axrjex̄in ir'va sín la tsoche kaín tí sín nínkakonhen sín la mé x̄ikaha its'en kaín tí sín tjinkaon sich'ehe sín daño tí jehe sín.

⁶ A ntá tí testigo i chóna kjuachaxin ts'ikjehe nkaya nkajní kíxin í ts'aniáhya chrin tí tsonixja sín kuènte Dios la ko kj̄axin chóna sín kjuachaxin tsontáche sín tí nt̄a kíxin ts'óna jn̄i la ko sinchek-jasótex̄in sín chojni chjasintajni nchónhya clase chin nchónhya veces éxí tí tjinkaon sín.

⁷ A ntá tí kjuixinhin sín tí xr̄a ntá tí ko jiehe ts'axrjex̄in tí t̄oye n̄inka mé tsjankíxin tsjanjonko tí jehe sín ntá tsjacha va ts'óyán va tí jehe sín.

⁸ A ntá tí cuérpōé sín tsitōhe sítsínka tí calle kuènte chjasin jié tí tsíkjak'enkani sín Ìnchéni ntacruz mé tí chjasin mé kj̄axin nchek'in sín Sodoma la ko Egipto.

⁹ A ntá iní yaon ko t'ò la kaín chojni itsjé chjasin la ko kaín nkexrí tsjehe sín la ko nchónhya nkiva la ko nchónhya nación ts'ikon sín tí chojni tsík'en tjejótsínka sín ntiha la ko tsjanjonhya sín kjuachaxin tsoxravá tí chojni tsík'en a.

¹⁰ A ntá tí sín tjejó chjasintajni tsochéhe sín kixin xikaha tsík'en tí sín a la antsí má tsochéhe sín la tsochr'án sín nchónhya nkehe nchekitonhen kichó sín kixin xikaha ik'uén tí yaá sín k'uéchrónka itén Dios kixin jehe sín kjuaxróxinhya k'uék'ixin sín tí chjasintajni tí k'uék'ejó tí sín a.

¹¹ A ntá chr'éxin ó k'uátsínka iní yaon ko t'ò la ntá Dios kjuínchexechón tí iyó tí sín a inaá la k'uàya sín inaá la ntá kaín chojni k'uíkon la imá chrakon sín.

¹² Ntá tuénxín tí iyó sín testigo kuínhin sín ijnko nkexro nixja itsen nkaya nkajní ntáchro kixin:

—Chrìyan xrakía antsí ntihi.

Ntá chrìinxín sín nkajní ijnko tjuì. A ntá kaín tí sín nínkakonhen sín la k'uíkon sín kixin xikaha kónhen sákjuì tí iyó sín a.

¹³ Ntá tuénxín imá kuínkí nonte la ntá ijnko ite parte chjasin ntiha la k'uitjáyan la yato mìl chojni tsík'en kixin tí kuínkí nonte. A ntá kaín tí sín xéhe imá chrakon sín la kjuankíxin sín tinkáchónki sín Dios la tjanchia sín kjuasáya.

¹⁴ Mé xikaha kónhen tí yóxin kjuaxikaon la ntá tuénxín itsi tí nixin kjuachrakon inaá.

Tí yatoxin trompeta

¹⁵ A ntá tí yatoxin ángel k'uánoa trompeta ntá kuínhin sín ijnko tan nkajní itsen ntáchro kixin: A ntá tí sín k'uáyéhe kjuachaxin kuènte chjasintajni la ó kjaxin nchexiteyéhe sín

Ìnchéni Jesucristo

kíxin jehe Jesucristo mé ts'et̩oan ch'án jnkochŕxín.

¹⁶ A ntá tí veinticuatro tí sín táda tjejótxaxín sín trono nkayakon Dios la mé k'uísén sín hasta káxín ikja sín nonte la tjanchehe sín kjuasáya Dios.

¹⁷ Ntáchro sín kíxin:

Tjáhani kjuasáya jaha Ìnchéni Dios imá chonta kjuachaxín.

Jaha itjen la ko xráxín tjen la ko jaha ts'inka ínaá.

Kíxin jaha k'uayéhé kjuachaxín jié kíxin xráxín tét̩oan.

¹⁸ A ntá kaín tí nación kónínkaon,

a ntá ó kui tí yaon jaha s̩inchekjásóte sín

la ko kjaxín jaha s̩inchekitoexián ijíe tí sín tsík'en

la ko tsjénkehé tí sín kjuít'aha xra chrónkaxín itán

la ko tí sín ó kjuinchetjóá la ko tí sín kjuikosáyehe tí ihníá,

mé tí chojni nteto la ko tí sín chánjan ntsíntsí.

Jaha tjoka s̩inchek'itjáyan tí sín chrókjuinchek'itjáyan chjasintajni.

¹⁹ A ntá xitjehé tí n̩inkoe Dios tjen nkaya nkajní,

a tí nkaxenhen kónoxín tí caja tjinká tí nkehe

tsík'et̩oan Dios. A ntá sítjónkíxín la ko nchónhya

ruido sítjonta la ko kuínkí nonte la ko imá tsánka k'uániá toni.

12

Tí chojni chjin la ko tí dragón

¹ A ntá kónoxín nkajní ijnko kjuaxroan jié mé ijnko chojni chjin iké tjákini éxí yaon tsjehe la chrínkí toté tjan itjen nitjó. A ntá tí kja tjan tjenkáya ijnko corona chóna teyó konotsé.

² A ntá tí chojni chjin a mé tjejá tjan la t'èya tjan kixin tjoté tjan kixin sinchekokjíhi tjan xjeen tjan.

³ Kjaxin kónoxín í jnko kjuaxroan nkajní mé ijnko dragón kjátse chóna yato kja la ite ntéé la jnkojnko corona jnkojnko kja. [Tí dragón mé ijnko kots'aja jié.]

⁴ Tí ntané mé nkánkákjen níxin parte konotsé kuènte nkajní la ik'ue chrítaón chjasintajni. A ntá tí dragón kjuák'e chók'èxin tí tjen tí chojni chjin mero tsokjíhi xjeen kixin tjinkaon tjoka chrókjóne tí xjan tsokjíhi.

⁵ A ntá tí xjan kjuínchekokjíhi tjan mé xjan ntoa kixin jehe ch'án mé ts'etuenhen ch'án kaín nación la tsochóna ch'án ijnko vara chica ts'etoanxín ch'án. Ntá tí xjeen tjan la mé Dios sákjuíko tí tjen ch'án t'etoan ch'án.

⁶ A ntá tí chojni chjin la kuínká tjan sákjuí tjan nteje kixin tsíkjincheyóxin Dios nketí sátsji tjan kixin ntaha tsoxranjon nkehe sine tjan mil dos cientos sesenta yaon.

⁷ Ntá chr'éxin xrínahya k'uíxin kjuanínkaon jié nkajní la mé tí arcángel Miguel la ko tí í so ángel xriko ch'án mé kjuánjonko sín tí dragón, la tí dragón la ko tí ángel kuènte mé kjuánjon sín.

⁸ Kjánchó kjuachahya tí dragón la kohya lugar kuènte nkaya nkajní.

⁹ Mé xíkaha kuakitsjexín sín tí dragón nkajní. Jehe mé tí konche ósé íkjí mé nchek'in sín diablo la ko Satanás. Jehe mé k'uékjich'iyehe tí chojni kuenté chjasintajni. Jehe la ko tí sín ángel kuènte k'uaxrjexín ntiha la kjuítsínka chjasintajni.

¹⁰ Ntá kuínhan itén ijnko nkexro nkaya nkajní itsen nixja ntáchro kixin:

—Ó kui ti tsaáxinni tí kjuachaxién tí Dios kuènténi la ko tí kjuachaxin t'ètoan Cristo kíxin ó k'uaxrjexín nkajní tí nkexro t'eka jìe tí kíchó ni mé kjuanchia jìe nchàkotjin la ko tie nkayakon Dios kuènténi.

¹¹ Tí sín kíchó ni la kjuacha sín kuaáxin sín kíxin tí ijnié tí Kolélo k'uitji la ko kíxin jehe sín chrónkaxín sín tí tan tsík'áyéhe sín la chrakonhya sín kjónté chrók'uenxín sín.

¹² A ntá jìe la tócháhará kaín rá tjejorá nkajní. Ntá nòda tí sín tjejó chjasintajni la ko ntayaon kíxin k'uínkajin tí ch'ín diablo la imá nínkaon ch'án kíxin ó nohe ch'án kíxin í kánhyó sé tsjak'e ch'án.

¹³ Ntá tí ch'ín dragón ó nohe kíxin k'uánótjenxin nkajní ikui chjasintajni ntá sákjuíchréhe tí chojni chjin chóna tí xjan ntoa kíxin chrókjuinчек'itjáyan tjan.

¹⁴ Kjánchó tí chojni chjin k'uáyéhe yaá kanenee kuènte kotjuanhnko ijié kíxin jína tsjaká tjan sátsji nteje kíxin ntá ikjín tsitohe tí konche. Sátsji tjan kíxin ntiha tsoxranjon nkehe sine tjan iní nánó ko t'o.

¹⁵ A ntá tí konche mé k'uaxrjexín ntá ir'va kíxin ts'óna ijnko ntario kíxin tjinkaon va chrók'uatjoáko tí tjan a tí ntá a.

¹⁶ A ntá tí nonte kjuínkítsa tí tjan a kíxin xitjehe ir'va nonte la kaín tí ntá k'uaxrjexín ir'va tí konche la ntahó sákjuí k'uixenhen.

¹⁷ A ntá tí dragón la imá kónínkakonhen tí tjan a ná imá kónínkaon kjuánjonko tí í so sín naxa kjéhya tí tjan a kíxin naxa titekaon sín tí nkehe tsík'ètoan Dios la naxa tinkáchónki sín tí nkehe tsíchrónka Jesucristo.

13

Tíyaá bestia

¹ Tí kjuak'é chrínta ntayaon ntá ntaha k'uíkuan chrìnxín ijnko bestia chónta yato kja la ko ite ntéé chojni t'ántaxínhin Dios.

² Tí bestia k'uíkuan mé tóyóhe kotigre la chónta toté éxí toté ko oso la ko tí ir'va la éxí ir'va koxra. Tí dragón kjuanjon kjuachaxin imá ts'etoan tí bestia a.

³ A ntá ijnko kja tí bestia chónta ijnko tsíchrít'ó jíé chónta chrók'uenxín ntá tsíkitohe jína ntá kuenté chjasintajni la chrakon chojni ntá chréhe sín tí bestia.

⁴ Kjuikosáyehe sín tí dragón kixin jehe kjuanjon tí kjuachaxin k'uáyéhe tí bestia ntá kaxin kjuikosáyehe sín tí bestia la ntáchro sín kixin:

—¿Xá nkexro chrókóyóhe tí bestia la xá nkexro chrókjuacha chrókjuanjonko tí jehe?

⁵ Kaxin tí bestia k'uáyéhe kjuachaxin tsontáchro kixin chónta kjuachaxin má la ts'ántaxínhin Dios la tsochónta kjuachaxin cuarenta y dos nitjó.

⁶ Ntá mé xikaha kjuích'e k'uántaxínhin Dios la ko k'uántaxínhin ihnié Dios la ko k'uántaxínhin tí ninko tjen nkaya nkajni la ko kaín tí sín tjejó ntiha.

⁷ Kaxin tsík'áyéhe kjuachaxin tsjanjonko tí sín tinkáchonki Dios hasta tsjacha ts'etuenhen tí sín ntá k'uáyéhe kjuachaxin ts'etuenhen kaín xín nkexrí tsjehe chojni la ko kaín xín chjasin la ko kaín xín tan la ko kaín xín nación.

⁸ A ntá tí bestia mé kaín xín chojni siín chjasintajni mé tsjikosáyehe sín tí bestia. Tí chojni a mé ts'ínixínhya ihnié tió k'óna chjasintajni, mé

ts'ínixínhya ihñié sín tí libro ts'inixín ihñié tí sín tsaá. Tí xroon a mé chóna tí Kolélo tsík'óyán sín.

⁹ La jnkójín nkexro tjinkaon chrókuinhin la chrókuinhin tíhi.

¹⁰ Tí nkexro sátsjiko tsjik'íkjehe í so chojni la kjaxin ch'án ts'íkjehe ch'án la tí nkexro tsjayaxin espada la kjaxin espada ts'enxín. A ntá tí nkexro tinkáchónki Dios la t'ichjánxin tsonínkakonhya la ko tsochóna fe.

¹¹ A ntá chr'éxin k'uíkuan í jnko bestia k'uaxrjexín nonte, chóna yaá ntèé éxí tsjehe ntèé coronta la mé nixja éxí nixja tí dragón.

¹² Tí bestia la chóna kaín xín kjuachaxin éxí k'uéchóna tí bestia saoxín tí k'ué la t'etuenhen tí sín siín chjasintajni kixin tinkáchónki sín tí bestia saoxín mé tí bestia tsíchrít'ò kja ntá tsíkitohe jína.

¹³ Kjaxin kjuasin kjuaxroan jié hasta xrohi k'uánótjénxin nkajní ikui nonte ntá nchónhya chojni k'uikonxín kon sín kixin xikaha kónhen.

¹⁴ Mé xikaha tí bestia tsík'áyéhe kjuachaxin kjuasin kjuaxroan tí tjen tí bestia saoxín la kjuích'iyehé nchónhya chojni siín chjasintajni. La ntá k'uetuenhen tí sín siín chjasintajni sich'éna sín ijnko nkehe tsíkjanoya éxí yóhe tsjehe tí bestia tsíchrít'oxin espada la kjónté xikaha naxa kjuák'echón.

¹⁵ A ntá tí yóxin bestia k'uáyéhe kjuachaxin tsochjéhe kjuachón tí nkehe tsíkjanoya tóyóhe tí bestia saoxín kixin ntá tí nkehe tsíkjanoya la jína tsonixja la ko jína ts'etóan its'en kaín nkexro tinkáchónkihya tí jehe.

¹⁶ Kjaxin ts'etóan kixin kaín chojni tsochóna marca, á chojni hyé o chojni ntsíntsí, la á chojni

rico, la á chojni nòa la á chojni ch'exón xra la ko chojni náhí, mé kaín sín tsochónta sín marca, á tja sín chjina o totjen sín.

¹⁷ Ntá ninkexró xitjahya ts'ena la ko ninkexró xitjahya sinchekji tí chóntahya sín marca o ihnié tí bestia o chóntahya sín número kuènte ihnié tí bestia.

¹⁸ T'ichjánxin chrókienxínrá tíhi. Tí nkexro tienxín la chrókónohe tí número chóna tí bestia kixin tíhi mé tí número chóna ijnko chojni la mé tí número mé seiscientos sesenta y seis.

14

Tí nkehe itsje tí ciento cuarenta y cuatro mil

¹ A ntá k'uíkuan tí Kolélo tjexín toté chrítaón tí jna Jerusalén. Jehé ch'án tjeko ch'án ciento cuarenta y cuatro mil chojni ts'ínixín totjen sín ihnié tí Kolélo la ko ihnié It'é ch'án.

² Ntá tuénxín kujnhan ijnko itén nkexro kujxin nkaya nkajní mé ijnko ruido éxí nchónhya ntarío la ruido éxí sítjonta itsen la éxí ijnko ruido nchónhya chojni it'in sín isón arpa.

³ Itsje sín nkehe nixin nkayakon tí trono la ko nkayakon tí noó nkexro tjejóchón la ko tí sín táda. Nijnko nkexro chrók'uitjahya tí nkehe tjejótsje sín; jehó tí sín ciento cuarenta y cuatro mil mé sín tsíkaá k'uék'ejó chjasintajni.

⁴ Tí sín a mé k'uéchóntahya sín itsjé chojni chjin la tjóá sín la chréhe sín tí Kolélo kjónté nketí k'uáji. Tí sín a mé kuaá sín tí k'uék'ixin chojni k'uékjasin jje la ko tí sín a mé éxí ijnko ofrenda xrankíxixín k'uáyéhe Dios la ko tí Kolélo kjaxin.

⁵ Kónoxínhya ninkehó kjuach'ia k'uaxrjexínhya ir'va sín. La tí sín la ninkehó jiē chóntahya sín tí tjejó sín nkayakon tí trono kuènte Dios.

Tí nkehe chrónka tí iní ángel

⁶ A ntá k'uíkuañ í jnko ángel tjetjaká jnkosiné nkajní chrónka tí tan tsaáxinni jnkochrixín tsinhin tí sín siín chjasintajni, mé tsinhin kaín nación la ko kaín nkexrí tsjehe chojni la ko kaín xín tan la ko kaín chjasin.

⁷ Ntá t'èya itsen ntáchro kixin:

—Chróchrakonrá la chróxráxinkáonrá Dios la chróchjehérá ch'án kjuasáya kixin ó kjuixraká tí yaon sinchekitoexín ch'án ijíé chojni. Tjikosáyeherá ch'án kixin jehe ch'án kjuích'éna ch'án nkajní la ko chjasintajni la ko ntayaon la ko tí sít'axrje ntá.

⁸ Ntá xíki yóxin ángel, ntáchro kixin:

—Ó kjuixin kjuítsínka, ó kjuixin kjuítsínka tí chjasin jié Babilonia. Mé ntiha kujxin tí vino kókuaxxin sín kaín nación ntá kjuasin sín jiē chóna sín chojni chjin ókjé.

⁹ Ntá xíki tí níxin ángel nixja itsen, ntáchro kixin:

—Jnkojín sín tsjikosáyehe sín tí bestia la ko tí nkehe tsíkjanoya kuènte o tsítóhe sín tsochóna tí marca tí totjen sín o tí tja sín,

¹⁰ mé t'ichjánxin its'i sín tí vino tsjasótexín sín kujxin tí tjen Dios kixin xikaha tjechónhen tí kjuanínkaon kuènte Dios ntá ntiha tsjasótexín sín tí xrohi la ko azufre mé xikaha tsonhen tí sín a ts'ikon tí sín ángel kuènte Dios la ko tí Kolélo.

11 Tí ihnchi kuènte xrohi sítjasótexín sín síchrìn jnkochrín la tí sín a kuinkáchónki tí bestia la ko tí nkehe tsíkjanoya kuènte o chóna sín ihnié kuènte.

12 A ntá tí sín tinkáchónki Dios la kuítekaon sín tí nkehe k'uetōan ch'án la ko naxa jína tinkáchónki sín Jesús mé t'ichjánxìn chrókuítóehya sín titekaon sín ch'án.

13 Ntá kuīnhan itén ijnko nkexro kuixìn nkajní ntáchro kíxin:

—Ikjian tíhi: “Náxrjón tjejó tí nkexro kjónté its'en sín ijie o chr'éxìn kíxin tinkáchónki sín Ìnchéni.” Kjá jína, ichro Nchākuen Dios, kíxin tí jehe sín ts'ok'éhe sín kíxin ó kjuích'e sín xra la tí xra kjuích'e sín mé kjuacha sín.

Tí nkehe tsík'óna chjasintajni

14 Ntá xrínahya k'uikuān ijnko tjuj tjóá la chrítaón tí tjuj tjetjaxìn ijnko nkexro éxí yóhe tjehe tí Xjeen Dios Tsík'óna Chojni tjenkáya ijnko corona tsík'óna chica oro tí kja ch'án la ko ijnko chica hoz imá taté tjexraá ch'án.

15 A ntá nkaxenhen nīnko mé k'uaxrjexín í jnko ángel itsen nixja ch'án nixjehe ch'án tí nkexro tjetjaxìn chrítaón tjuj ntáchro ch'án kíxin:

—Tjankíxian tātēxian chica hoz kíxin ó kjuixraká tí yaon tsotjá tí nkehe síin chjasintajni kíxin tí nkehe tsík'óna chjasintajni la ó tsícha.

16 Ntá tuénxín tí nkexro tjetjaxìn chrítaón tjuj ntá kjuínchek'átsínka ch'án chica hoz kuenté chjasintajni la kjuenájín ch'án nkehe tsík'óna chjasintajni.

17 Ntá k'uaxrjexín í jnko ángel tí nīnko tjen nkaya nkajní la kjaxin sákjuíko ch'án ijnko chica hoz imá taté.

18 Ntá sákjuíxin í jnko ángel tí tjen altar la chón̄ta ch'án̄ kjuachaxin kuènte xrohi la itsen k'uíyeh̄e ch'án̄ tí nkexro chón̄ta tí ch̄ica hoz imá taté la ntáchro ch'án̄ ḱixin:

—Tjanḱixian t̄at̄exian tí ch̄ica hoz taté la tjanḱixian it̄j̄a tí racimos to uva tsík'ón̄a chjasintajni ḱixin ó tsíchjé to —ichro ch'án̄.

19 A ntá tí ángel kjuínchek'atsínka tí ch̄ica hoz chrítaón̄ tí nonte ntá chrín̄jin tí to uva tsík'ón̄a tí nonte ntiha. Ntá sákjuík'enk̄a ch'án̄ to tí t̄jat'ò ts'ényaxín sín to. Tíha mé t'axrjexín ḱixin x̄ikaha Dios sinchekjasóte chojni.

20 A ntá tí to uva tsík'ényaxín sín t̄jat'ò tí ikon chjasín a ntá tí t̄jat'ò a mé k'uaxrjexín nchón̄hya j̄n̄i noixín éxí tí freno tjinká ir'va kok̄ate la trescientos kilómetro ḱinxin sátsík̄ji tí j̄n̄i a.

15

Tíyato tí ángel la ko tí chin tsjixixín

1 Ntá k'uíkuañ tí nkajni í jnko kjuaxroan jié mé ijnko kjuachrakon: mé tí yato sín ángel kuík̄ao tí yato chin tsjixixín tsoníexín chojni. Tíha mé tí kjuanínkaon kuènte Dios tsjixixín.

2 Kjaxin k'uíkuañ ijnko nkehe tóyóh̄e ijnko ntayaon tsík'ón̄a éxí xrosent̄a tsínkík̄jan xrohi. La tí sín tsík̄jacha ḱixin kuinkáchón̄kihya sín tí bestia la ko tí nkehe tsík̄janoya kuènte la ko kuáhya sín tí número kuènte ih̄nié tí bestia mé tjejóxin toté sín chjinaxón̄ ntayaon tsík'ón̄a éxí xrosent̄a la ko chón̄ta sín isón̄ arpa tsík̄janjon Dios tsík'áyeh̄e sín.

3 Itsje sín isón̄ k'uétsje ch'ín̄ Moisés, tí nkexro kjuích'ehe xr̄a Dios la ko isón̄ kuènte tí Kolélo la mé ntáchro ḱixin:

Imá ijié tí kjuaxroan kuèntá ḱixin kaín nkehe tsíkjiç'h'éna.

Jaha Ìnchéni Dios kaín kjuachaxin chonta.

Ntoá la ko chaxín tí nt̃ia kuèntá.

Jaha mé ijnko Rey t'et̃oan kuènte chjasintajni.

⁴ ¿Xá nkexro chrakuanhya tí jaha Ìnchéni?

¿Xá nkexro tjáhya kjuasáya ḱixin jaha mé ijnko nkexro jína tjóá?

Kuenté chjasintajni tsjikosáyehe sín tí jaha ḱixin k'uík̃on sín tí xr̃a tsíkjiç'h'e la jína tíha.

⁵ Kjuixin tíha la k'uík̃uan nkajní tjexrankehe tí ñinko la ko tí cuarto tjóá t'inkachjina tí nkehe tsík'et̃oan Dios.

⁶ A ntá tí ñinko a k'uaxrjexín yato ángel kuik̃ao yato chin. Tí iké sín la ika tjete tjóá tják̃ini. A ntá tí cinta chóna ntakuin sín mé jehó oro.

⁷ A ntá ijnko tí noó tí nkexro tjejóchón mé kjuanjon ijnko copa k'uáyéhe jnkojnko ti yato ángel mé copa tsík'óna chica oro tsíkaón tí nkehe tsjasótexín chojni kuix̃in tí t̃jen Dios tí nkexro tjechón jnkochŕixín.

⁸ A ntá tí nkaxenhen ñinko la tsíkaón ihnchi kuix̃in tí kjuachaxin jié kuènte Dios la nijnko nkexro xitjahya ts'ixenhen ntiha tsjixinjian ts'átsínka tí yato tí chin kuik̃ao tí yato ángel.

16

Tí copa tjínká nkehe tsjasótexín chojni

¹ Ntá kuinhan ijnko itén ijnko nkexro imá itsen k'uaxrjexín nkaxenhen ñinko, ntáche tí yato sín ángel ḱixin:

—Sátjia tikíkanjian chrítaón chjasintajni tí nkehe tjiá tí yato copa la táha mé tsjasótexín chojni kuixín tí tjen Dios —ichro ch'án.

² A ntá tí ángel saoxín sákjuík'itji tí nkehe tjiá tí copa chrítaón chjasintajni. A ntá kaín tí chojni chóna marca kuènte tí bestia la ko tjikosáyehe sín tí nkehe tsíkjanqya kuènte tí bestia mé tsík'ayan sín tosóa, imá tjotéhe sín.

³ A ntá tí yóxin ángel sákjuík'itji tí nkehe tjiá copa chrítaón ntayaon. A ntá tí ntayaon la k'óna jni éxí ijnié ijnko chojni tsík'óyán kichó la kaín ko sínkánkí ntayaon ik'uén.

⁴ A ntá tí níxin ángel sákjuík'itji tí nkehe tjiá copa chrítaón ntario la ko chrítaón tí ntá sít'axrje tòye, la ntá tí ntá k'óna jni.

⁵ Ntá tuénxín kuinhan nixja tí ángel kuènte ntá ntáchro kixin:

—Jaha mé ijnko nkexro jína kixin kjuinchekitoexián ijje chojni. Ichéni jaha ijnko Dios jína, ósé tjen la ko naxa tjen ijie

⁶ kixin jehe sín k'óyán tí sín tinkáchónki tí jaha la ko tí sín tsíchrónka itan la ntá jaha Inchéni chjehé sín ijni its'i sín kixin mé xikaha sítjasóte tí jehe sín.

⁷ Kjaxin kuinhan nó altar ijnko nkexro ntáchro kixin:

—Chaxín Inchéni Dios, jaha mé chonta kaín kjuachaxin la ntoá jína kjuinchekitoexián tí ijie a.

⁸ A ntá tí noóxin ángel sákjuík'itji tí nkehe tjiá copa chrítaón yaon, a ntá tí yaon antsí k'uáyéhe kjuachaxin tsosóa kixin tsochjánxin chojni tí sóa kuènte.

⁹ A ntá kaín chojni chjánxin tí imá sóa kuènte yaon la k'uántaxínhin sín ihnié Dios mé jehe ch'án mé tí nkexro chóna kjuachaxin kuènte tí chin a. La kjónté kjuinkíhya sín tí nkehe tinkáchónki sín la xraxinkakonhya sín Dios.

¹⁰ A ntá tí in'óxin ángel sákjuík'itji tí nkehe tjiá copa chrítaón tí trono t'etoxán sín tí bestia. A ntá kaín tí k'uéchóna kjuachaxin k'uék'etoxan tí bestia la k'uíxin tié. A ntá tí chojni a la netja nejen sín kixin tjtóthe sín.

¹¹ La kjónté xikaha la kjuinkíhya sín tí nkehe jínahya ch'e sín. Náhi. Íchá má k'uántaxínhin sín Dios tjen nkaya nkajni kixin tjtóthe sín kixin xikaha kónhen sín.

¹² A ntá tí injonxin ángel sákjuík'itji tí nkehe tjiá copa chrítaón ijnko ntarío jié it'in Eufrates. A ntá tí ntarío la kjuixié kixin jína tsakitjehe sín ijnko ntia tsjixin tí sín rey tsjixin nó tjtioxin yaon.

¹³ A ntá k'uikuán kixin ir'va tí dragón la ko ir'va tí bestia la ko ir'va tí profeta ntoáhya tjako mé k'uaxrjexin iní nchakuen tí jínahya éxi korána tsjehe.

¹⁴ Tíha mé nchakuen tí jínahya kjuasixín sín kjuaxroan. A ntá sákjuikjinchekójnkotsé kaín rey siín chjasintajni kixin tsjanjon sín ijnko yaon jié kuènte Dios chóna kaín kjuachaxin.

¹⁵ “Tsjehe, janhan titàya ts'inké éxi ijnko xíchee. Chéhe tí nkexro tjejótsjehe la t'ayakonhen tí iké kixin ts'itjányanhya kixin chrók'uajihya sín tjóchin sín la chrókósuèhya sín kixin chrókónoxín kixin tjóchin sín.”

¹⁶ A ntá tsojnkotsé tí sín rey tí nonte it'in Ar-magedón nkiva Hebreo.

¹⁷ A ntá tí ángel yatoxin sákjuík'itji nkehe tjiá copa chrítaón tí xrinto ntá nkaxenhen ninko nkaya nkajní k'uaxrjexín ijnko itén chojni itsen nixja mé kujxin tí tjen tí trono la ntáchro kixin:

—Ó kjuixin kónhen tíha.

¹⁸ A ntá sítjónkixin la ko ruido sítjonta la ntá imá kuínkí nonte fuerte. La desde tí kjuankixin k'uixin chojni chjasintajni la xikahya kónhen kuínkí nonte a ntá jie antsí fuerte kuínkí nonte.

¹⁹ A ntá tí chjasin jie xitjehe nonte la iní k'óna, chjenca. La koí káin chjasin siín chjasintajni tsík'oya. A ntá Dios xraxinkaon kixin chrókjuínchekjasóte tí sín siín tí chjasin jie Babilonia la k'uetōan ch'án its'i sín tí vino tsjasótexín sín kixin mé xikaha kónínkaon ch'án.

²⁰ A ntá káin tí nonte sínkátáon ntayaon k'uániankí ntá la ko tí jna k'uitjáyan.

²¹ A nta nkajní k'uánótjēnxin toni ijié xrátja chojni mé cuarenta kilo yexín jnkojnko toni. A ntá chojni na antsí má k'uántaxínhin sín Dios kixin tí xikaha kónhen sín xrátja sín toni la imá kjoté sín.

17

Tsjasóte tí tjan jínahya

¹ A ntá ikui ijnko tí yatoxin ángel chóna tí yato copa la ntáchro ch'án kixin:

—Xrákiá tsjákooha nkexrí tsjasóte tí chojni chjin tjasin jie tjetjaxin tjan chrítaón tí nchónhya ntá.

² Tí sín rey t'etōan chjasintajni kjuasinko tjan jie la ko tí chojni siín chjasintajni kókuānxin sín tí vino a mé kjaxin kjuasixín sín jie.

³ **A** ntá tuénxín Nchakuen Dios sákjuikian nteje ntá k'uíkuan ijnko chojni chjin tjetjaxin chrítaón ijnko bestia kjátse la kuenté tí ko a la síma ihnié náxrjónhya tsík'ántaxíenxín sín Dios la chóna yato kja la ko ite ntèé.

⁴ **A** ntá jehe tjan chóna tjan iké tjan morado la ko kjátse la teyá tjan chica oro la ko xro náxrjón la ko perla. Tjexraá tjan ijnko copa tsík'óna chica oro tsíkaón nkehe jínahya tsjasixín tjan jie.

⁵ Tí totjen tjan ts'ínixín ijnko ihnié kohya nkexro tienxín. “Tíha mé tí chjasin jie Babilonia, mé ìné tí chojni chjin tjasin jie la ko kain chojni jínahya ch'e síin chjasintajni.”

⁶ Ntá kónóna kixin tí tjan a la tsékanxin tí ijnié tí sín tinkáchónki Dios la ko tí ijnié tí sín tsík'énxín tí chrónka sín kixin tinkáchónki sín Jesús. Ntá k'uíkuan xikaha imá chrakonna.

⁷ **A** ntá ijnko ángel ntáchro ch'án kixin:

—¿Nkekuènté chrakuan? Ntá ijie sîntanoha tí nkehe tienxínhya chojni kuènte tí tjan a la ko kuènte tí bestia tjejen tjan chóna yato kja la ko ite ntèé.

⁸ Tí bestia k'uíkuan jaha kjuák'e ósé la ijie tjechónhya kjánchó senó tsochrìinxín tí tòye ninka ntá chr'éxin ts'itjayan. **A** ntá tí sín síin chjasintajni ts'ínixínhya ihnié sín tí libro ts'ínixín ihnié chojni tsaá desde k'óna chjasintajni, la mé jehe sín tsochrakon sín tió ts'ikon sín tí bestia kjuák'e ósé la tsík'en la ntá ijie xikjan inaá.

⁹ Tí jnkojín nkexro chrókiénxín la mé tí yato kja la t'axrjexín yato jna tjejen tí chojni a.

¹⁰ **A** ntá tí kja kjaxin t'axrjexín yato rey la ntá in'ó tí sín rey la í t'etuñhya sín ijie la ijnko tí jehe

sín t'et̥oan ijie la í jnko naxa tjihya. A ntá tió tsji tí yat̥oxin la í kánhyó sé ts'et̥oan.

¹¹ A ntá tí bestia kjuák'e senó la ijie tjechónhya mé tí jnixin rey la jehe ch'án kuènte tí yato rey la chr'éxin la ts'itjáyan.

¹² 'A ntá tí ite ntèé tsík'ikuan mé ite rey naxa t'etuanhya. A ntá ijie la ts'áyéhe sín kjuachaxin ts'et̥oanko tí bestia kjánchó kánhyó sé.

¹³ Tí ite tí rey la jnkokoá tsjenkayáxin sín la tsjanjon sín kjuachaxin kuènte sín kixin ts'et̥oan tí bestia.

¹⁴ Tsjanjonko sín tí Kolélo a ntá tí Kolélo la tsjacha ts'et̥oan kixin jehe ch'án mé Inché kaín chojni la ko jehe ch'án mé tí Rey ts'etuenhen kaín rey la ko tí sín tjejóko ch'án mé tsík'íyehē Dios la tsíkjejá ch'án sín la jína nchexiteyá sín.

¹⁵ Kjaxin ntáchro tí ch'ín ángel kixin:

—Tí ntá k'uíkuan la chrítaón tjetjaxin tí chojni chjin tjasin jie la mé t'axrjexín kixin nchónhya chjasin la ko nchónhya chojni la ko nchónhya nación la ko nchónhya nkiva.

¹⁶ A ntá tí bestia k'uíkuan la ko tí ite ntèé la tíha mé tsonínkakohen tí tjan tjasin jie la tsit̥ohe tjan tjóchín tjan la sine tí bestia tí nto chóna cuérp̥oé tjan la ko tsoche tí hués̥oé tjan.

¹⁷ Dios tsík'etuenhen asén sín kixin xikaha sich'e sín éxi tjinkaon ch'án kixin jnkokoá tsjenkayáxin sín la ko tsjanjon sín kjuachaxin kuènte tí sín rey kixin ts'et̥oan tí bestia tsoxiteyáxia tí nkehe tsintáchro Dios.

¹⁸ A ntá tí chojni chjin k'uíkuan la táha mé tí chjasin jie t'et̥oan tí sín rey t'et̥oan chjasintajni.

18

Kjuítsínka chjasin Babilonia

¹ Ntá chr'éxin k'uíquān í jnko ángel k'uínkajinxin nkajní chóna nchónhya kjuachaxin ntá chjasintajni antsí k'uínkaséyanni tí tjákini tsjehe ch'án.

² Ntá k'uíyato ch'án itsen ntáchro ch'án kixin:

—Ó kjuítsínka, ó kjuítsínka tí chjasin jié Babilonia. Ntá tí jínahya ó kjuacha k'uíxehen t'etōan ntiha la ntiha siín kaín xín clase nchakuen jínahya la ko siín kaké ko xritjaká tjuáhya la ko jínahya.

³ A ntá kaín xín nación kókuānxin tí vino kjuínchekji tjan ntá kjuasinko tjan sín jiē la ko tí sín rey t'etōan chjasintajni kjaxin kjuasinko tjan jiē. La tí sín nchekji nkehe chjasintajni kórikoxín sín kixin k'uēna tjan nchónhya nkehe.

⁴ Ntá kuínhan í jnko itén nkexro kujixin nkaya nkajní ntáchro kixin:

—T'axrjéxinrá tí chjasin ntiha kixin tí jahará tinkachónkirá tí janhan kixin chrók'uícahyará tí ijié sín la ko chrókjuasótexínhyará tí nkehe tsonhen sín.

⁵ Kixin tí nchónhya jiē tinkák'ánki hasta kjuixraká nkajní la Dios ó nohe tí jiē chóna sín.

⁶ Ch'eherá tjan éxi tí jehe tjan kjuích'ehe tjan í so chojni kixin xikaha tsjasótexín tjan. Chrókjuenkehérá tjan iyó veces éxi tí tsíkjich'éna tjan ik'ui í so chojni.

⁷ Antsí chrókjuasóte tjan tóyóhe tí nkehe kjuích'e tjan kixin kjuínchehnke tjan la ko k'uéchóna tjan kaín nkehe tóxrjínhin tjan. Jehe tjan ntáche asén tjan kixin: “Ntihi tjétjaxian éxi ijnko reina. Jehya ik'ána kixin chrókjuasótena.”

8 Mé x̄ikaha k̄j̄axin jnkokoá yaon itsi tí k̄juaxikaon tsonhen tjan mé its'en tjan la ko tsjasótexín tjan kjinta la tsoche tjan k̄ixin Ìnchéni imá chón̄ta k̄juachaxin la jehe ch'án sinchekjasóte ch'án tjan.

9 A ntá tí sín rey síin chjasintajni tsíkjasinko sín tjan j̄ie la ko nchónhya nkehe k̄juínchexenko sín tjan la mé tsotsjánka sín la ts'èya sín tió ts'ikon sín ts'àya ihnchi tió tsoche tjan.

10 Ntá jehe sín tsitohe sín ikjín k̄ixin chrakon sín k̄ixin x̄ikaha tsjasóte tjan la tsontáchro sín k̄ixin:

—Nòa tí jaha chjasin j̄ié Babilonia, chjasin imá t'et̄oan k̄ixin titàya k̄juasótia.

11 Tí sín xrinchekji nkehe la k̄j̄axin tsjánka sín, t'èya sín k̄ixin x̄ikaha kónhen tí chjasin ntiha k̄ixin kohya nkexro ts'enehe sín tí nkehe sinchekji sín.

12 K̄juínchekji sín chica oro la chica plata la ko ixr̄o náxrjón la ko perla la ko ika náxrjón lino la ko ka seda la ko ika color morado la kjátse la ko k̄j̄axin kaín xín clase nta náxrjón xraxé la ko tí nkehe tsík'óna neno elefante la ko inta náxrjón la ko bronce la ko ixr̄o chica la ko ixr̄o mármol.

13 K̄j̄axin xrinchekji sín canela la ko xroan xraxé náxrjón la ko chjinc̄o la ko xroan mirra la ko crema la ko vino la ko aceite la ko harina náxrjón la ko noa trigo la ko iko tamá nkehe la ko kolélo la ko kokat̄e la ko carreta la ko chojni ch'exón x̄ra k̄j̄axin k̄juínchekji sín.

14 Tsontáche sín tí chjasin a k̄ixin:

—Í chontahya kain to tjete imá k'uékóxrjínhan. Ó k'uítj̄ayan kaín nkehe náxrjón tjete k'uéchonta.

15 Tí sín k'uékjinchekji tí nkehe la kóríco sín ḱixin kjuacha sín tí xr̄ kjuích'e sín tí chjasin ntiha. Ikjín k'uéjo sín ḱixin chrakon sín ḱixin xikaha kónhen kjuasóte tí chjasin. Tsjánka sín la t'èya sín

16 la tsontáchro sín ḱixin:

—Nòda tí chjasin jíé. Éxí ijnko chojni chjin tsík'itsa ka lino náxrjón la ko ika morado la kjátse la ko teyá nkehe oro la ko xr̄ náxrjón tjete la ko perla.

17 A ntá jnkorato koá kjuixin kjuéje tí nkehe imá tjete —ichro sín.

Kaín tí nkexro t'et̄oan tí ntabárc̄o la ko tí sín tsík'ixenhen tí ntabárc̄o la ko tí sín ch'e xr̄ chrítaón ntayaon kuítóhe sín ikjín

18 la tió k'uíkon sín tí ihnchi síche tí chjasin ntiha la k'óyako sín ḱixin:

—¿Xá nkexéhe í jnko chjasin chrókóyóhe tí chjasin jíé í?

19 La tjíjjanjin kja sín nche la tsjánka sín t'èya sín ḱixin:

—Nòda tí chjasin jíé. Kóríco tí sín k'uéchóna ntabárc̄o chrítaón ntayaon ḱixin tí chjasin i la ntá jnkorató koá kjuixin k'uítj́ayan tí nkehe chóna sín.

20 A ntá jahará tjejorá nkajní tócháhará ḱixin xikaha kónhen tí chjasin a. Tócháhará jahará k'uájikoará Ìnchéni la ko jahará k'uéchronkará itén Dios la ko kaín rá kuinkachónkirá tí jehe ch'án ḱixin Dios kjuínchekjasóte tí chjasin a ḱixin tí jíe kjuasin sín kjuínchekjasótíará sín tí jahará.

21 A ntá ijnko ch'ín ángel chóna kjuachaxin kjuatsen ijnko xr̄ éxí ijnko xr̄ jíé kuènte molino la k'uenkí ch'án ntayaon la ntá ntáchro ch'án ḱixin:

—Mé xikaha tsonhen tí chjasin Babilonia, tí chjasin jíé la nunca ts'ikonhya chojni chr'éxin.

²² Nunca tsienhya sín música kuènte isón arpa la ko flauta la ko trompeta tí ntja la ko ninkexró xitjahya sich'e ninkehó xra ntiha la ko kjaxin tsienhya sín ninkehó tóvéntó xro molino.

²³ Í ts'inkaséyanxínhya xrohi kuènte ninkehó lámpara la kjaxin í tsienhya sín ts'ixin kia tsotehe chojni ntiha. Tí sín k'uékjinchekji nkehe ntiha la imá k'uék'etoan kuènte chjasintajni la tí sín k'uékjich'iyehe tí sín síin chjasintajni la k'uékjich'e sín jínahya, k'uédkjinchexroan sín.

²⁴ A ntá tí chjasin jíé ntiha tsíkónoxín ijnié tí sín tsík'en k'uéchrónka itén Dios la ko tí sín tinkáchónki tí jehe ch'án la ko kain tí sín tsík'enxín chjasintajni.

19

¹ Ntá chr'éxin ntá kuínhan itén nchónhya nkexro tjejó nkaya nkajní itsen nixja, ntáchro sín kixin:

¡Aleluya! Kjuasáyé Dios kuaáxinni la ko jehe ch'án t'inkaséyanxín ch'án ti jeheni la imá chóna kjuachaxin Dios kuènteni.

² Kixin jehe ch'án ntoá kjuínchekjasóte ch'án tí tjan kjuasin nchónhya jie

kixin jehe tjan kjuachroe tjan chojni síin chjasintajni kixin tí nkehe jínahya k'uékjich'e tjan.

Dios kjuínchekjasóte tjan kixin k'óyán tjan tí sín k'uékjich'ehe ch'án xra.

³ La ntá kjaxin inaá xintáchro kixin:

—¡Aleluya! Kjuasáyé Dios kixin tí ihnchi síchexín tí jehe tjan tsítóehya chrin hasta tí ntihi.

⁴ A ntá tí veinticuarto tí sín táda la ko tí noó nkexro tjejóchón tjejóxin toch'in sín hasta káxin kja

sín nonte kjuikosáyéhe sín Dios tí nkexro tjetjaxin
tí trono la ntáchro sín kixin:

—¡Amén! ¡Aleluya! ¡Kjuasáyé Dios!

⁵ Ntá xrínahya kuínhin sín itén ijnko nkexro tjen
nó trono ntáchro kixin:

Chjehérá kjuasáya tí Dios kuènteni kaín rá ch'ehérá
ch'án xra

la kuítekákonnénrá ch'án,

mé kaín tí jahará kjónte chánjan ntsíntsí o chojni
nteto.

Tí kia tsotehe tí Kolélo

⁶ Kjaxin kuínhan nkehe éxí itén nchónhya cho-
jni éxí nchónhya ntarío sítóvéntó la ko imá itsen
sítjonta la ntáchro kixin:

¡Aleluya! Kjuasáyé Ìnchéni ó kjuankíxin t'etōan
Ìnchéni Dios kuènteni chóna kaín
kjuachaxin.

⁷ Chrókóchéheni la chrókjuikosáyeheni Dios

kixin ó kjuixraká tí yaon ts'ixin kia kuènte Kolélo.

La tí tjan tsotehe la tsíkóyaxínhin tjechónhen,

⁸ mé tsík'áyéhe kjuachaxin tsík'itsa ka lino náxrjón
tjóá tjákiní.

A ntá tí ka lino náxrjón a mé t'axrjexín kixin tí jína
k'uejó tí sín tinkáchónki Dios.

⁹ Ntá tí ch'ín ángel k'uetōan ch'án kixin:

—Ikjian tíhi: “Náxrjón tjejó tí nkexro k'uáyéhe
kjuachaxin sátsji tí kia tsotehe tí Kolélo.”

A ntá ntáchro ch'án inaá kixin:

—Tí palabra a mé chaxín ntoá nixja Dios.

¹⁰ Ntá kjuak'éxian toh'ian toté tí ángel kixin
chrókjuikosáyaha ch'án, kjánchó jehe ch'án ntáchro
ch'án kixin:

—Xikahya chrokjuich'e kixin janhan kjaxian t'ahā xrā Dios éxí tí jaha la ko éxí tí sín kichuá kuítóehya kuítekaon tí tan jína chrónka Jesús. Jehó Dios mé chrókjuikosáyehé jaha.

Tí nkehe k'uéchrónka Jesús mé k'uéchrónka tí sín profeta.

Tí nkexro kjuák'ekjen kokate tjóá

¹¹ Ntá k'uíkuan kixin nkajní tjexrankehe la ntaha kónoxín ijnko kokate tjóá la ko tí nkexro tjekjen va mé it'in Jína la ko Chaxín kixin ntoá kjuínchekitoxén ch'án ijíé chojni la ko ntoá kjuánjonko ch'án chojni.

¹² A ntá tí ikon ch'án mé tjákiní éxí xrohi nene xikaha tsjehe. A ntá tí kja ch'án la chóna nchónhya corona la ko ts'ínixín ijnko ihnié ijnko nkexro la jehó ch'án mé nohe ch'án tíha.

¹³ Tjenkáya ch'án ijnko ka tsík'ixikjanjin jni ntá ihnié ch'án mé Itan Kuènte Dios.

¹⁴ Chréhe tí sín soldado kuènte nkajní. Iké sín mé ka lino náxrjón tjóá la tjejókjén sín kokate tjóá.

¹⁵ Ir'va tí jehe ch'án k'uaxrjexín espada imá taté kixin táha mé tsjik'óyánxin ch'án tí sín siín kaín nación la ko ts'etoxánxin ch'án ijnko chica vara. Jehe ch'án mé sinchekitoxén ch'án ijíé sín éxí t'énxin sín to uva toté sín mé xikaha ts'etuxen ch'án kixin its'i sín vino tsjasótexín sín kixin mé xikaha tsixín tí kjuanínkaon kuènte Dios chóna kaín kjuachaxin.

¹⁶ Iké ch'án mé ts'ínixín kixin jehe ch'án me Rey t'etuxen kaín rey la ko jehe ch'án mé Ìnché kain chojni.

¹⁷ Ntá tuénxín k'uíquān ijnko ángel tjexín toté tí tjen yaon la k'uéyato ch'án itsen k'uéyatohe ch'án tí ko xritjaká, ntáchro ch'án kixin:

—Xrákirá tójnkotsérá ntihi kixin Dios tsjanjon nkehe sinterá ijie.

¹⁸ Sinterá cuerpo kuènte reyes la ko sinterá cuerpo kuènte tí sín comandante la ko cuerpo kuènte chojni jjehe la ko ntoe kokate la ko cuerpo kuènte tí sín tsíkjiták'á va la ko cuerpo kuènte kaín chojni libre o chojni ch'exón xra la chojni hyé o chojni ntsíntsí.

¹⁹ K'uíquān tí bestia la ko tí sín reyes t'etōan chjasintajni la ko tí soldado kuènte sín, tsíkójnkotsé sín tsjanjonko sín tí nkexro tjejen kokate la ko koí tí sín soldado kuènte ch'án.

²⁰ A ntá itsé sín tí bestia kixin sátsji tsjasóte la ko kjaxin itsé sín tí nkexro ntoáhya k'uékjako itén Dios la ko k'uékjasin ch'án kjuaxroan náxrjón nkayakon tí bestia mé xikaha kjuích'e tí nkexro ntoáhya kjuako, kjuích'iyehé ch'án tí sín tsíkítóhe tsíka marca kuènte tí bestia la ko kjuikosáyehe sín tí nkehe tsíkjanōya kuènte tí bestia. Ntá tí bestia la ko tí nkexro ntoáhya kjuako itén Dios mé k'uítuenhen sín sátsji tí síin xrohi tsoche tjejóchónxinhín sín tsochéxin azufre.

²¹ A ntá tí í so sín la ts'enxín tí espada k'uaxrjexín tí ir'va tí nkexro tjejen tí kokate tjóá la kaín ko xritjaká ts'ixin tí síin tí cuerpo kuènte tí jehe sín la hasta tsokjehe va sine va.

20

Tí mil nánó

¹ Ntá xrínahya k'uíkuañ ijnko ángel k'uínkajinxin nkajní tjexraá llave kuènte tí tòye ninka la ko ijnko cadena jíe tjexraá ch'án.

² A ntá tí ángel a itsé tí dragón mé tí konche ósé kji mé tíha tí ch'ín diablo la ko Satanás la kjuak'echroé ch'án ijnko mil nánó.

³ Ich'án ch'án sákjuí tòye ninka ntá k'uikjehe ch'án la ko kjuak'e ch'án ijnko sello chrítaón puerta kíxin ntá tí dragón chrókjuich'iyehya tí chojni síin kaín nación hasta chrók'uatsínkajia tí mil nánó. A ntá ts'atsínka tí mil nánó ntá tsoxintankehe kjánchó séhya its'e.

⁴ Ntá tuénxín k'uíkuañ tí trono la ko tí sín tjejótxajin tsík'áyéhe sín kjuachaxin sinchekitoexín ijíe chojni. Kjaxin k'uíkuañ asén chojni tsíchínjin kja kíxin kuítekaon sín Jesús la ko tsíchónkaxín sín itén Dios. Jehe sín la kuinkáchónkihya sín tí bestia la ko tí nkehe tsíkjanoya kuènte la ko kuítóehya sín ikuá sín marca tí totjen sín o tí itja sín. Mé k'uíkuañ kíxin tsíxechón sín la ko ts'etòanko sín Cristo ijnko mil nánó.

⁵ Ntá í so chojni tsík'en la naxa xechónhya hasta ts'atsínkajia tí mil nánó. Tíha mé xrankíxixín tsoxechón chojni.

⁶ Náxrjón tjejó tí sín tsíkjinchetjóá Dios mé tí sín a mé senó tsoxechón sín. A ntá tí yóxin chrók'uen sín la tíha chóntahya ninkehó kjuachaxin naxa xikaha chrókónhen sín. Jehe sín mé nchat'á kuènte Dios la ko kuènte Cristo la ts'etòanko sín ch'án tí mil nánó.

⁷ A ntá ts'átsínka tí mil nánó ntá ch'ín Satanás tsoxintankehe tí kjíchroé.

⁸ La sátsjikjich'iyehé tí chojni síin kuenté chjas-intajni la ko sátsjikjich'iyehé tí chjasin Gog la ko Magog. La tsojnkotsé sín kixin tsjanjon sín la ko tí soldado kuente tí jehe sín. Nchónhya sín tsojnkotsé ntiha éxí tí nchesen síin ntayaon.

⁹ Mé xikaha sátsji sín tí tonxín la ko tí tekaxin nonte la ts'ántatjen sín tí tjejó tí sín tsíkjinchetjóá Dios mé tí chjasin jié tjuèhe ch'án. A ntá xrohi tsixin nkajní kixin tsochexín tí sín jínahya ts'itjáyanxín sín.

¹⁰ A ntá tí diablo tsíkjich'iyehé tí jehe sín kjaxin sátsji tsochexín xrohi la ko azufre tí sátsíkji tsíchexín tí bestia la ko tí nkexro ntoáhya kjuako itén Dios. Mé ntiha mé tsjasótexín nchakotjin la ko tie jnkochrín.

Tsitōexín ijé chojni tí tjen tí trono jié tjóá

¹¹ Ntá k'uíkuan ijnko trono jié tjóá la ko tí nkexro tjetjaxin nó ntiha. A ntá tí tjen ch'án ntiha la ó k'uitjáyanakoá nonte la ko nkajní la í kónoxínhya ínaá tí nonte.

¹² Ntá k'uíkuan tí sín tsík'en; chojni hyé la ko chojni ntsíntsi tjejóxin toté sín nkayakon Dios la ntá xitjehe iso libro la ko xitjehe í jnko libro ts'ínixín ihnié tí sín tsaá. Ntiha tsitōexín ijé chojni tsík'en éxí nixja tí í so libro nkehe tí xra kjuích'e sín ts'ínixín ntiha.

¹³ Tí sín tsík'enxín ntayaon la ntiha xrakuaxin sín la tí sín sátsíkji tí síin chojni tsík'en la ntiha xrakuaxin sín kaín sín tsochjina sín tsitōexín ijé jnkojnko sín kixin nkexrí tí xra kjuích'e sín.

¹⁴ Ntá tí kjuachaxin kuènte kjuach'én la ko tí tsík'ejó tí asén tí sín tsík'en sátsji tsoche tí xrohi tsochexín, mé tí muerte yóxin tíha.

¹⁵ La ko ntaha sátsji tí chojni ts'ínixínhya ihnié sín tí libro ts'ínixín ihnié chojni tsaá.

21

Nkajní nixin la ko nonte nixin

¹ Ntá k'uíkuan ijnko nkajní nixin la ko ijnko nonte nixin kixin tí nkajní saoxín la ko tí nonte saoxin tsík'itjáyan la ko kjaxin kohya ntayaon.

² Janhan Juan k'uíkuan tí chjasin jié tjóá. Táha mé tí Jerusalén nixin k'uínkajinxin nkajní kuixin tí tjen Dios la kuenté tsíkóyóxin éxí ijnko chojni chjin tsoṭehe tsík'itsa kixin tsákja tí xíí.

³ Ntá kuinhan ijnko itén ijnko nkexro itsen kuixin nkajní ntáchro kixin:

—Dios itjen tí síin chojni, la ts'ejóko sín tí jehe ch'án la jehe sín mé ts'óna chjasén ch'án la Dios a mé ts'ejóko sín ntiha la mé ts'óna Dios kuènte sín.

⁴ Jehe ch'án mé sinchexámá kaín ntakon sín la í tsokohya nkexro its'en la tsokohya nkexro tsot-sjánka la ko ts'aváhya sín la ko tsokohya kjuatjoté kixin kaín tí nkehe k'uékónhen ósé la ó kjuixin k'uátsínka.

⁵ A ntá tí nkexro tjetjaxin tí trono ntáchro ch'án kixin:

—Janhan mé t'ána kaín nkehe nixin.

Kjaxin ntáchro ch'án kixin:

—Ikjian tíha kixin tíha mé palabra chaxín la chrókuítekávan kaín tíha.

⁶ Ntá chr'éxin chrónka ch'án kixin:

—Kaín nkehe la ó kjuixin tsík'óna. Janhan la tí xrankíxixín la ko tí tsjixixín éxí tí letra xrankíxixín A la ko tsjixixín Zeta. Tí nkexro t'énxín ntà la janhan tsotjahà sín tí ntà its'i sín mé tí ntà tjanjon kjuachón la ninkehó ts'ixinkíéhya sín tíha.

⁷ Tí nkexro tsjacha tsítóehya tí janhan la ts'áyéhe sín kaín tí nkehe tsotjahà sín. La janhan mé ts'óna Dios kuènte sín, a ntà jehe sín mé xjanna ts'íkaan tí jehe sín.

⁸ A ntà tí chojni chrakon la chojni titekakon-hya la tí sín chjinoxínhin la ko tí chojni ts'óyán kíchó la ko tí chojni tsakja chojni chjin ókjé la ko tí chojni xrinchexroan la ko chojni tinkáchónki nkehe tsíkjanoya la ko kain chojni ch'ia mé tí sín a mé ts'ítuenhen sátsji sín tí siín xrohi tsochexín sín azufre tió itsi tí yóxin muerte.

Tí Jerusalén nixin

⁹ Ntá ikui ijnko tí yatoxin ángel chóna tí yatoxin copa tsíkaón tí yatoxin chin tsjixixín tsjasótexín chojni. Ntá ntáchro ch'án kixin:

—Xrákia tsjákoaha tí tjan tsotehe tí Kolélo.

¹⁰ Ntá k'uíkuan ijnko nkehe kjuakoxin Nchakuen Dios la ntà tí ángel sákjuíkian ijnko jnà jié la ko noi la kjuakona ch'án tí chjasin jié tjóá mé tí Jerusalén ts'inkajinxin nkajní tsíkixin tí tjen Dios.

¹¹ A ntà tí chjasin a mé tjákinixin kjuachaxin kuènte Dios. A ntà tjákiní éxí ijnko xro imá náxrjón tjete éxí xro jaspe éxí xrosentà tsjehe.

¹² A ntà jnkontatjen tí chjasin chóna tjat'o noi la chóna teyó puerta la jnkojnko ángel jnkojnko puerta tjejónta la ihnié tí teyó tí sín tsík'axrjenixin sín Israel ts'ínixín jnkojnko puerta.

13 La iní puerta la nó tjitoxin yaon la iní puerta la nó norte la iní puerta la nó tjiatóxin yaon la iní puerta la nó sur.

14 Tí tjat'o tsík'antatjen tí chjasin chóna teyó xro chóntaxín fuerza tí tjat'o la jnkojnko ihnié tí teyó tí sín k'uájiko tí Kolélo a mé ts'ínixín jnkojnko tí xro a.

15 A ntá tí ángel tjenixjana chóna ijnko nta vara oro, éxí tji tsjehe, tsjachoxín tí chjasin la tí puerta kuènta chjasin la ko tí tjat'o t'inkákuènxin.

16 Tí chjasin la cuadrada la tí kjinjinxin jnkokón la ko tonxín la jnkokón. A ntá tí ángel kjuachoxín tí chjasin tí nta vara éxí tji tsjehe tsíkjachoa ch'án tí chjasin mé chóna dos mil dos cientos kilómetro tí kjinjinxin la ko tí nteoxín la ko tí tonxín la jnkokón.

17 Ntá tsíkjachoa ch'án tí tjat'o tsíkintajin tí chjasin a la chóna sesenta y cuarto metro kixin éxí tjachroa chojni chjasintajni mé xikaha kjuachoa tí ángel.

18 Tí tjat'o tsík'antatjen tsík'óna xro jaspe, a ntá tí chjasin tsík'óna jehó chica oro tóyóhe jehó xrosenta tjoá.

19 Tí xro tsík'óna xrankíxixín tsík'antatjen tí tjat'o la nchónhya xro chjiní náxrjón tsínkíkjan. A ntá tí xro xrankíxixín la jaspe, a ntá tí xro yóxin la zafiro, la tí xro nixin la ágata, a ntá tí noóxin la esmeralda.

20 A ntá tí n'óxin xro la xro mármol la tí injonxin la cornalina, la tí yatoxin la crisólito, a ntá tí jnixin la berilo, la tí xro naxin la topacio, la tí texin la crisoprasa. A ntá tí tejncoxin la jacinto, a ntá tí teyóxin la amatista.

21 A ntá tí teyó puerta mé tjejó perla la jnkojnko puerta tsík'óna jnkokoá perla. A ntá tí ntia

jié kuènte chjasin la tsík'óna jehó chica oro éxí xrosenta tsjehe.

²² Ntaha la k'uíkõnhya ninkehó n̄nko tí chjasin a, ḱixin Ìnchéni Dios chóna kaín xín kjuachaxin la jehe ch'án la ko tí Kolélo mé tí n̄nko ntiha.

²³ Tí chjasin a mé t'ichjánxinhya yaon la ko ni nitj́o ts'inkaséyanxín. Ḱixin tí t'inkaséyanxín la Dios la ko tí Kolélo mé tí xrohi kuènte.

²⁴ A ntá tí chojni kuènte kaín nación tsíkaá la ts'ikõnxín tí xrohi kuènte tí chjasin la tí sín tsík'óna reyes chjasintajni la ntiha tsjanjon sín tí nkehe k'uéchóna sín.

²⁵ A ntá tí puerta kuènte chjasin la tsík`èhya tí nchakotjin la ntaha la tsokohya ts'ixin tie.

²⁶ Ntaha sátsjiko kaín xín nación tí nkehe náxrxón k'uéchóna sín chjasintajni.

²⁷ A ntá ntaha mé xitjahya ts'ixenhen ninkehó nkehe tjuáhya, la ninkexró chj̄j̄nõxínhin o chojni ch'ia. Jehó ts'ixenhen tí sín ts'ínixín ihnié tí libro ts'ínixín ihnié tí sín tsaá, mé tí libro chóna tí Kolélo.

22

¹ A ntá tí ángel kjuákona ijnko ntarío tjóá, a ntá tí nta a mé tjanjon kjuachón. Táha mé t'ikõnxínni éxí xrosenta la mé k'uaxrxén tí trono kuènte Dios la ko tí Kolélo.

² A ntá jnkosiné tí calle tjetoan kuènte tí chjasin a la ko nanánko tí ntarío ntiha itjen tí inta tjanjon kjuachón mé t'óna to teyó veces jnkõjnko nánó ḱixin t'óna to jnkõjnko nitj́o. Tí ka kuènte tí nta la xroan tsitoexín jína tí nación sínn ntiha.

³ La mé ntiha tsokohya ninkehó kjuachj̄j̄nõxínhin la tí trono kuènte Dios la ko

kuènte tí Kolélo la ntiha tjen tí chjasin. La tí sín ch'ehe ch'án xra la mé tsjikosáyehe sín ch'án.

⁴ Ts'íkon sín tí kàré Dios la ko tsochónta sín ihnié ch'án tí totjen sín.

⁵ Ntiha la tsokohya ts'ixin tie la tí sín síin ntiha la t'ichjánxienhya sín xrohi kuènte lámpara la ko ni xrohi kuènte yaon kixin Ìnchéni Dios mé ts'inkaséyanxín sín ntiha la ko tsochónta sín kjuachaxin kuènte Dios jnkochrín.

Tí itsi Ìnchéni la kánhyó sé

⁶ A ntá tí ángel mé nixjana ch'án ntáchro kixin:

—Tí itan a mé chaxín la chrókuítekákonhén tí tan a. La ko Ìnchéni mé tí Dios nchexraxinkaon tí sín nixja kjuachaxin ihnié ch'án mé ichr'án ch'án tí ángel kuènte ch'án kixin tsjakuexin ch'án tí sín ch'ehe ch'án xra, tí nkehe tjoka tsonhen.

⁷ —¡Tjoka ts'inka janhan!

Náxrjón tjejó tí sín titekaon tí itén Dios nixja tí libro i.

⁸ Janhan Juan, kuinhan la ko k'uíquau tíha. A ntá chr'éxin kjuixin kuinhan la ko k'uíquau tíha ntá kjuak'éxian toch'ian chrínkí toté tí ángel kixin xikaha kjuakona la ntá chrókjuíkosáyaha ch'án.

⁹ A ntá jehe ch'án ntáchro ch'án kixin:

—Xikahya sich'e kixin janhan kjaxin t'aha xra Dios éxí tí jaha xikaha la ko éxí tí sín kichuá mé tí sín nixja itén Dios la ko kaín tí sín tjinkaon chrókuítekaon nkexrí nixja tí libro i. Mé jehó Dios chrókjuíkosáyehé.

¹⁰ Kjaxin k'uetuanna ch'án kixin:

—Chrókjuak'echjinahya tí nkehe jahvá kuinhín kuènte Dios éxí nixja tí libro i ḱixin ó kuichjina tí yaon tsoxiteyá.

¹¹ A ntá tí sín ch'e jínahya ája nohe sín ch'e sín tí jínahya. A ntá tí nkexro ntoáhya ch'e la ája nohe ch'e tí nkehe ntoáhya. A ntá tí nkexro ch'e nkehe tóxrjínhín Dios la naxa chrókjuich'e xíkaha la ko tí nkexro tsíkjinchetjóá Dios la naxa jína chrók'uejó sín chrókuitekaon sín tí jehe ch'án.

¹² —Chaxín tjoka ts'inka janhan la ts'inkakian tí nkehe tsotjāhará jnkojnkorá ḱixin nkexrí tí xra chuich'erá.

¹³ Janhan mé tí xrankíxixín la ko tí tsjixixín la janhan mé tí saoxín la ko tí tsjixixín éxí tí letra xrankíxixín A la tsjixixín Zeta.

¹⁴ Náxrjón ts'ejó tí nkexro tsíkjen iké ḱixin tsochóna sín kjuachaxin tsochjinehe sín tí nta tjanjon kjuachón ḱixin jína ts'ixenxín sín tí puerta kuènte chjasin.

¹⁵ A ntá ntója tsitohe tí chojni jínahya kuítekakonhya la ko tí chojni nchexroan la ko tí sín chóna nchónhya chojni chjin la ko tí chojni tjàya la ko tí chojni tinkáchónki tí nkehe tsíkjanoya la ko tí chojni tóxrjínhín xrich'ia.

¹⁶ —Janhan Jesús mé ichr'an tí ángel kuèntana ḱixin tsochénka kaín nínko kaín tíha. Janhan mé k'uaxrjeníxian tí rey David la ko janhan tí konotsé itji tí chjina t'inkáséyan.

¹⁷ Tí Nchakuen Dios la ko tí sín tinkáchónki tí Kolélo ntáchro ḱixin:

—Xrákiá.

La tí sín tjejótinhin la ntáchro sín ḱixin:

—Xrákiá.

A ntá tí nkexro t'enxín ntá t̄jinkaon ntá la chrók'ui tí ntá tjanjon kjuachón la ninkehó ts'ixinkíhya tíha.

¹⁸ Kaín nkexro tjejótinhin itén Dios ts'ínixín tí libro i la chrókónohe sín tíha: Jnkojín sín chrókjuich'éna í so nkehe chrónixja la Dios mé antsí sinchekjasóte tí jehe sín tsoníhi sín éxí nixja tí libro i.

¹⁹ A ntá jnkojìn nkexro tsjatsen jnkojín palabra chóna tí libro i la Dios tsjatsen tí nkehe chrók'uáyéhe sín chóna tí libro ts'ínixín ihnié tí sín tsaá la ko Dios tsjatsen tí nkehe chróchóna sín tí tjen tí chjasin tjóá kixin éxí nixja tí libro i.

²⁰ A ntá tí nkexro chrónkaxín tí tan i mé ntáchro kixin:

—Tjoka ts'inka janhan.

Amén. ¡Xrákiá. Ìnchéni Jesús!

²¹ Ìnchéni Jesucristo mé sincheyaonrá kaín rá. Amén.

**Tí Nuevo Testamento cuènte Inchéni
Jesucristo C'óna Nquìva
New Testament in Popoloca, San Juan Atzingo**

copyright © 1982 Wycliffe Bible Translators, Inc.

Language: Popoloca, San Juan Atzingo

Translation by: Wycliffe Bible Translators, Inc.

Popoloca, San Juan Atzingo [poe], Mexico

Copyright Information

© 1982, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Popoloca, San Juan Atzingo

© 1982, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

b9b09122-b3f6-59f0-9594-749907b32b5b